



09102

碑傳集

第四十二冊
校官 佐貳 襍職



卷一百一十一
之二百十三

碑傳集卷一百一十一目錄

校官上

錢廣文珍傳錢澄之

魯山教諭李君兆元墓誌銘新讓

温州府平陽縣儒學教諭沈公雍行狀吳隆元

吳教授之駮傳張伯行

祭司訓志奇傳藍千秋

張金友傳陶元藻

蔡恭靖先生壁墓誌銘張伯行

文林郎嵩縣儒學教諭傅君上襄元配范孺人合葬墓誌銘張伯行

程氏兩學博傳劉自潔

程可順鵬舉

內邱縣儒學教諭李君國碩墓誌銘李燾

俞學博廷棟傳沈德潛

陳鶴齡傳于安國

學博陳君熊墓誌銘沈德潛

儒林郎江南溧陽縣教諭韋君前謨墓誌銘劉綸

又教諭韋君傳彭啟豐

祥符教諭呂君灃曾墓誌銘陳清

碭山縣教諭謝先生晉行狀邵齊燾

含山縣訓導蔡先生瓏墓誌銘王永

修職佐郎狄道州儒學訓導李君法墓表張洲


...

...

...

...

...



校官上

錢廣文珍傳

錢潘之

康熙二十五年歲在丙寅貴池學諭蘇州錢君韋亭卒於官其卒也以修學宮竭心力勞瘁而死所謂以死勤事者也於是合邑紳士請諸上得從祀名宦貴池自明季以來學宮傾圮四十餘年至不能陳俎豆君初至愴然以興復爲己任會某公署邑篆允君請首倡捐助君率諸生多方勸募資未集土未遠興躬自督作不避溽暑廢寢食者累月遂病病中日至工所手畫口授晷刻不離羸瘠已甚役者皆感泣趨事文廟告成人勸且暫緩明倫堂以俟病君憤曰吾甯死耳役不可緩時已委頓牀蓐絕無他語惟籌物料計工程諄諄趣役就功工匠聞之爭相勉勵恐負君三月事以竣君令人扶掖出至堂上一觀遂不起君素壯健有精神至是枯瘠狼狽見者莫不悲歎蓋積勞所致也貴池諸生哭曰先生精力竭矣爲學宮竭實爲吾黨竭也先生雖身死不恨而吾黨重累先生而速之死吾黨何以爲心哉皆哭盡哀又池郡公甸之役多派

佛傳一百十一

一

百里甲君悉蠲往例給工價一如民間以是人樂赴公功易集故君殁里民亦相語而泣不獨諸生嗷嗷然哭也先是廣文有李鼎袁孟堪者皆以有功學宮得祀祀典至是邑士大夫暨諸生上其事郡縣引例以請當事允議依例從祀而其子太學生大鏞乞子爲之傳君名鏞字介臣韋亭其號也子于君皆出自吳越按世序固鴈行也君之先有諱簡者以父官平江買田漕湖之上卜居永昌里是爲漕湖派及曾大父字潘公始卜居蘇州郡城家世業儒多顯者君生而資敏有至性三歲失母事繼母以孝聞終其身母子相依爲命父病急刲股和藥以進無知者臨革乃出創痕示其子鏞其隱德誠孝如此少貧力學讀書徹旦膏盡有老僕私出錢買燭以繼酷暑置兩足甕中以避蚊喙老僕臥疾前伴君讀亦徹夜不寐僕死君歲時致祭焉年二十餘入崑山縣庠食餼丙午南闈擬元語犯時諱見擯戊午試北場既得復失遂以歲貢生循例授廣文得貴池到官著士箴八則語該體要人多傳誦尤好提獎孤寒時加賑卹有貧不能輸糧而重受累者量爲代輸每除夜齋廚蕭然念諸生中貧無以度歲輒給少錢與買米薪歎曰不能徧及也君所受俸脩甚廉又好施子學宮之設費不繼則舉其室服御所有悉付質庫

以是家益貧歿之日囊無一錢上官僚友及諸生共相仗助喪始克舉
有七男六女男長者卽鏞也次者纒能勝衣長女適張氏餘皆呱呱泣
妻盧氏繼劉氏妾潘氏皆有出食指數百去家千里其何以歸家無卓
錫地卽歸其何以爲生傷哉然君以一命儒官於職至微死而列諸俎
豆君死爲不朽矣子於君屬有宗誼素交好固略悉其本末因鏞請遂
据實爲之傳

論曰以君才美篤行少時勤學不倦人爭以大物相期而所就僅若此
豈不悲哉然世之取上第致高位者不乏草亡木卒未數年鄉里不能
舉其名氏視君之以一廣文從祀學宮名載千秋者其得失爲何如哉
士所重者千秋耳千秋之名出自公論爲可重也若夫無其實而有其
名徒以氣力情賄得之而公論不與又未可與君同日語矣

魯山教諭李君兆元墓誌銘

新議

康熙四十年歲辛巳正月魯山教諭蘓庵李君卒於任其孤以狀來請
余敘卒葬余惟李氏之先代稱甲族君先世洪洞人明初徙大梁後徙
尉氏數傳至大父諱懷確力學好古不求聞達父孝廉公諱會字淞冷
崇禎癸酉登賢書甲戌中副車潛心理學所著有四書雪光錄尙書管

神傳一百一十一

見史略勸學課行諸書明季寇陷尉氏欲授以爵不屈罵賊自投於隍
死丈夫子三長諱周元字伯和余己酉鄉同年也次及君諱兆元字仲
顯號蘓庵垂髫授書儼若成人孝廉公就義君年未及冠擗踊號泣不
欲生未幾祖妣以疾終方寇賊搶攘時丁兩大喪佐兄含斂耐葬雖倉
卒一準於禮大事竟奉母避亂河朔開竭力致養益勤於學甯家後兵
燹餘燼未撲滅所居村寇相戒不入里人以爲孝感云王子登賢書爲
陳留令王君所拔士禮閣下第歸卽讀書陳留署制藝題一文必二之
一短篇樞先輩一長篇爲順時之作莫不各踞其勝己未就教職需次
里居遘母夫人病衣不解帶者三月餘母夫人竟獲安乙丑除鞏縣教
諭故事學官由孝廉授者得計偕上公車君志氣彌厲而卒不售命也
在鞏廉靜守職立教條以示諸生每月集明倫堂反復訓誡以敦倫立
品爲首務次以文藝定甲乙又梓先儒格言徧給諸生鞏士一時彬彬
稱盛焉學宮樂章殘缺舊維因陋就簡君至乃致曲阜樂師授習於學
官又製禮樂器小大燦然畢備每值丁祭檢閱鼎鼐牲牲務從豐潔至
今鞏縣禮樂爲八郡首稱庚午聞母夫人之變勺水不入口太守汪公
檄令俟新任交割君不可卽日俶裝出郭門諸生祖道畢集歸臥苦塊

中喪葬一依考亭家禮王申服闋補魯山縣教諭學宮殿廡戟門敞而新之課士立教一如在鞏時閒與僚友攜琴出游採商餘之仙樂弔紫芝之高踪邑北有琴臺時登臨懷古作詩以寄慨焉先是兄伯和司鐸光山縣君寓書期以冬月同乞身歸無何伯和卒君常鬱鬱庚辰遭疾改歲而卒正月二十一日午時也距君之生天啟甲子三月二十六日亥時得年七十有八君留心禮樂以敬恕爲本主作字必端楷晚年愈好讀書六經諸子朝夕不釋於手旁通天文算數九流百家之說問奇者踵相接也聞耿逸庵倡學高陽書院君命子瀚往問策復購書送藏書樓河使者俞存齋過鞏相訪談至夜分歎服而去寶靜庵亦嘗寄書商訂所學洛東高士趙玉鉉執贄其門每來請益講學娓娓不倦又篤於天倫輕財樂施貧士匱乏乞假不厭其煩有官於鞏者物故君贈賻獨厚且恤其家伯母劉子少高年嬰疾君訪醫藥不憚勞賴以痊復後數年卒經紀其喪無不曲至所著詩古文甚夥尤達於易喪歸尉氏鄉黨知與不知無不哀慟泣下君之忠信篤實感人者遠矣子潯等以是年十二月初九日葬君於邑之東南理村崗祖塋元配潘氏邑庠生潘士彥女繼配祖氏直隸新城縣庠生祖述道女子三長潯邑庠生娶邑

碑傳一百一十一

庠生楊健女次瀚庚午科舉人娶邑庠增廣生劉呈祥女繼娶浙江太學生錢棲梧女三瀏殤女四長適通許縣庠生張坤次適通許縣范文貞三適扶溝縣盧徵雲四適扶溝縣張佃孫男五維楠維橋維桓潯出維楠維榛瀚出孫女二一潯出一瀚出曾孫一輝維楠出因勒石紀君之生平於窆邱以告幽明銘曰

三亭降英仙李擢秀濂洛宗旨千載咀豆君學既邃而位不副寡彼芹藻兀彼薪樞入拜瞽宗出教齒胄經義治事湖州有後人之云亡失此耆耆封域旣安松栢斯茂于斯萬年比天地壽

吳隆元

温州府平陽縣儒學教諭沈公雍行狀
余家世前坵與竹溪沈氏比里而居姻亞稠疊不勝指屈平陽學博閑存先生余之父行也少時隨先君子後得接先生丰采洎後先生宦甌而余自通籍後湛浮宦途鮮里居日用是不獲復承先生道範乙酉奉諱歸里與先生令子炳震兄弟遊文酒觴譙無閒旬月尤熟悉先生學筵絳帳不媿安定每思擇筆記之而筆力闕茸仲紙瑟縮既而炳震兄弟持其所錄行述固請於余余雖譎陋不文而義不可卻因排纂臚列以俟當代椽筆銘而授之貞珉焉先生諱雍字升政號閑存歸安沈氏

之第十三世也始祖餘慶公自千金村移居竹溪世有隱德七傳爲筠溪公以明經任青州通判以子司馬公孫司空公貴贈各如其官筠溪公長子司馬公諱子木登嘉靖己未進士歷官南京都察院右都御史贈兵部尚書諡恭靖司馬叔子司空公先生之高王父也諱徹烱登萬曆己丑進士歷官南京工部尚書諡襄敏明史有傳曾祖衷翼公以蔭官太常寺典簿祖體長公明經候選縣令考麟兮公庠生年二十二而歿先生甫生十四月而孤先是熹廟時司空公開府雲南值黔之奢崇明滇之安效良交煽搆逆滇南兩迤振動滇城之幾陷者數矣是時逆陶盜柄廟堂置滇度外餉援皆絕司空公守禦備至勦撫兼用賊卒就擒事具本傳旋拜南京少司馬晉司空而黨焰愈熾公以忤黨爲閣黨石三畏所劾落職功遂寢莊烈時廷論滇功賜金幣召用未起而歿十三年司空公叔子給諫公復抗疏論功始于世蔭錦衣而先生父祖已相繼早世先生爲司空公大宗遂以名列上得旨准襲是時先生甫襁褓而名已徹當寧國榮家慶里黨豔之六七歲時流賊坌起祖母嚴母茅攜先生避寇村落荒山茆屋至卽掃地浴誦蘆汀沙渚吟晤欸乃聲相和也然往往昏夜晨星挾書而走鼓柁而避流離轉徙而獨學懇懇

碑傳一百一十一

四

不資師友而學日以進先生既少孤終鮮強近門戶無撐持者而承祖父遺烈麟兮公雖早沒然夙有時名與復社諸先生遊承王謝之門風挾顧廚之節概才情氣魄足以號召名宿敦盤玉帛交遍東南先生纂承父志以童年酬接如吳祭酒王奉常以暨甫草澹心諸前輩莫不道世譜稱執友耳目濡染見聞宏博固不獨經生之漁獵也然先生以少年承門第廣結納所交接者都遺山臬羽流輩寢思以飛禍中之時海氛猶熾有孔帥者以重兵駐京口譏訶不逞而大江以南巨室世家猶稱繁庶孔帥容心焉每得賊輒導之攀引爲羅織地寸符尺檄懸索千萬少不遂欲家立破吳人重足莫敢枝梧有札投先生者先生卽單舸走京口謁於軍門孔帥氣方盛幾陷不測先生直前曰國家所以重公者以能捉賊耳奈何陷平人作賊孔帥怒愈甚先生辭愈厲卒不撓久之帥改容曰向札乃僞耳君無慮先生長揖而出刀槍雪隊無不咋舌攝先生之膽由是家得全而吳中亦藉以安枕崑山司寇徐公時以名孝廉遊吳下公之祖端銘先生司空公己丑房師也自先生祖父皆以通門舊好數相往來司寇贈公行述有云歸安沈襄徹慈溪姜奉常之後歲通往來嘗語乾學等曰此祖宗以來通門舊好也

用是與先生有舊訪先生於竹溪觴詠流連致為傾倒因勸先生遊京師而先生亦當貢入國學遂策蹇入都雅為大司成學山陳公所器重為六館諸生領袖名方曠兩闡以書戒曰吾家門風不墜不在軒冕能讀書勵品斯為善承先志布衣吾榮之安藉科第哉先生得書過歸歸而祖母嚴患疽方暑疽潰跪而吮之閱三月疾以瘳而母以憂瘁遂不起先生傷幼孤之不及事厥考也所以色養者備至而又痛母之不獲享上壽也所以哀毀者獨深擗踊號慕感絕行路卒哭後拭淚以帷帷為之衰友朋姻黨見其瘠容柴骨欲為慰警語未發而先生淚已汎瀾往往酸鼻而止先生於書無不讀而司馬公司空公世仕宦藏書既富而於前朝典故搜羅尤備先生最所究心每舉一事無不原原本本如目其事而身其地者余昔在館閣登東海公之堂與聆四明萬季野先生經制之講足使心驚魄動聽者忘疲余嘗謂以先生方之殆相伯仲得先生與之往復亦藝林佳話也先生既少奉兩闈之訓而性尤恬退絕意仕進歲丙寅誼授臨之平陽先生曰廣文不足為官昔人有以仕隱者余竊慕之臨故與閩接壤士風洵茂猶有考亭遺澤先生既至廟以立品勉以讀書庠之兩廡闢以為諸生誦讀之所蜂房蟻戶人據一

碑傳

一百一

五

室讀書恆至丁夜兩廊燈火達旦不息先生時於暗中巡行戶外有所觸輒叩門入坐剖晰論列諸生聞在某室皆趨而環聽已相與開爐瀹茗奉先生先生每持杯謂曰吾固不敢擬安定然未知安定當日有此樂否恆相與一笑而出邑迭遭兵火俎豆匪缺略弗備先生購而全之禮器濟楚雖上庠弗及也山邑荒陋家無藏書先生攜數萬卷便學者講誦籃輿捆載擔僕肩頽人皆笑之先生弗恤也先生以學校為文獻地會無成書掌故缺焉乃輯學志一書為數十為例二十二發凡起例實先生之創作也書既成郡守見而嘆服遂以志委焉先生持論極平操筆極慎別貞邪嚴褒貶名教所在尤兢兢焉如惺臺吳先生之忤閩陳茶人之殉義闡揚不遺餘力他如夏生之母早寡矢節教二子有成為之立傳李生之女未嫁殉夫以為奇節也先生曰女在室當從父不當殉且殉非禮也卒斬之凡殘碑斷碣磨薛剔苔不憚山巔僻地敗屋榛莽無不周歷旁搜摩挲捫讀而舊志之傳譌影附者皆曲徵博引抉其非是當其初羣論或以為疑而先生確然獨斷斬然下筆及其後平心讀之鮮不以為允蓋先生見地高明學問該洽故其去取無不當其敘述無弗工耳文章固先生之職業而尤先生之能事小試其手

何足爲先生多哉。歐多名山水先生芒鞋竹杖裏糧而往，恆涉旬不歸。凌冒絕壁，攀援箐叢，所至必有作。其模範山水，發揮性情，康樂弗過也。若其登江心而弔信國之孤忠，過一洋而慨文成之蒙謗，想其流風一唱三歎，深情溢乎簡外，可以知先生之尚友，亦可以識先生之寄託。此則先生醞釀深厚，知人論世，借山川以發之，固不獨捫參歷井，窮極探覽。比比登臨之紀述而已。至其敘鴈蕩之勝語，奇怪則劇心，銳目摹名勝，則心曠神怡，與吾師蓉湖先生之紀無不印合。又各爭奇，昔人稱臥遊，乃知不僅圖畫，因笑牧齋老人紀霞客所述，猶屬耳食多挂漏也。余嘗過炳震兄弟齋，請而讀之，愛之靡已。而讀先生自序，猶抑焉若無一。是者，先生之謙沖，何又如此乎？屏有管生者，知讀程朱書，以力行自命。其外父畀之田，歲入數十斛，生以爲非義也，欲歸之學宮。先生以書御之，略曰：士君子於辭受，取與閒，不爲苟且也，亦不爲矯激也。妻父之子田，充類至義，未云浼我也。足下以高世之操行，尚義之事，恐合外父將視爲迂且矯，不大拂其愛女之心乎？且捐之學宮，常歲所入，應有典司，而或因事挪移，隨時耗散，漸久漸多，試以某今日自度，并度後之繼某而至者，苟有錙銖顆粒之漸染，皆爲足下之罪人也。經云：作事謀始。

神傳一百一十一

六

某旣與聞盛舉，豈敢過爲矯激，然使不慎圖，所終保無追咎。此則不得不爲之慮，而受之者亦萬萬不可苟且也。某竊謂足下高懷絕俗，雅操莫回，盍反其田於外家，俾世守其業，不則訪其祠墓所在，捐奉蒸嘗，則愛女之情與卻田之意，並存不廢，某不探固陋，且將僭爲撰述，頌揚斯舉。於以風世勵俗，豈不休乎？齋豐數百言，生不聽，先生再三論之，卒不受。生知先生之意堅，乃奉先生教，卒歸其家爲墓。田岸之士亦以名其田爲開田云。先生性淡泊於世，故無所好在。甌不以家累自隨，與學者講業外，掩關卻掃，蕭然枯僧，常自詠曰：身閒堪友鶴，官冷更過僧。蓋實錄也。其教學者以涵養氣度爲先，常曰：從容二字，受用不盡。一日讀書暴雨，侵案起而掩戶，引手挫甲，顧謂學者曰：余嘗以從容教學者，今乃深媿急遽變化氣質，固大難事。名其所教人之書曰：越雪集。夫先生之詩人和平謙抑如此，而乃慮夫召閑取怒乎？當司空公戊子舉順天與太倉縑山先生爲同年友，最稱莫逆。今相國顯菴爲縑山文孫，與先生夙敦世誼，視學兩浙時，尤加器重。先是相國同年東海公午未開兩以書召先生，應宏博科。先生卻之甚力，嘗稱先生之高於相國，至是相國將列啟事，顧不合。先生知有同官某馳書爲先生賀，先生上書數千言。

力辭之相國高其志勿強也謂人曰吾謂陶彭澤世不復見今乃坐失之蓋人皆樂於仕而仕本非先生所樂人皆難於仕而仕猶非先生所難不知者咸爲先生屈先生曰本不求仲何屈之有予方懼夫一仕之重辱高曾耳由此觀之先生之志有非尋常淺識之所能知而先生亦不欲人知不然而以先生之門闕文章兼以有力者之推挽何難坐致膺仕而顧樂以寒氈苜蓿老哉此余排述之餘竊自謂有以知先生而又重爲先生致慨者也先生訓子極嚴性復甯靜諸子皆不合隨侍指館時本無綿疾偶示微恙嗒然而逝蓋十餘年蕭署清閒內養之功固不少也先生生於明崇禎戊寅七月十四日卒於康熙壬午三月廿三日享年六十有五元配金氏繼配董氏子四人炳貞炳震炳炳異炳謙女子八人婚嫁皆名族著有平陽學校志二卷實宋齋文集三卷玉蒼山房詩集四卷越雪集輯古格言綱目纂釋各如干卷余嘗謂先生之著述品行在里閭其居鄉也後生末學奉爲模楷吾黨之太邱也其居官也老生宿儒尊爲典型庠序之安定也先生胸懷灑落生平無恩怨嘗訓諸子曰儒者言忠恕佛家言平等其義一也世間恩仇何處著我胸中聞者心折焉余雖不及奉先生之教嘗與炳震兄弟來往見其守身若

碑傳一百一十一

七

處子讀書如不及愈益嘆先生家法之嚴家學之遠迥非時下褻履之習用以繼先生之志而光大其門閭者其在此夫此固余之所樂爲論讓而義之所不敢辭者也

吳教授之駮傳

張伯行

吳達菴名之騄字耳公徽州歙縣人生而穎異三歲能識字母程太孺人誨以孝經學庸背誦不差一字四歲就外傳過目成誦六歲解平仄聲韻九歲學春秋抽問左國中疑難者輒能以意解之十歲應童子試邑宰目爲神童嗣因避亂黃山讀書真州蘭若館舍產靈芝因名其堂以誌瑞云戊申歲補弟子員自後每試冠軍壬子登賢書闈墨爲海內傳誦甲寅適三藩肆逆有富家長賊搶掠以私餽冀免者後值人民安堵不無自危迨新守蒞徽達菴邀諸紳士往迎備道愚民無知情狀懇槩免究其詞最爲婉切守以爲然即出示安民各鄉皆得免株連之禍壬戌冬授績溪縣教諭慨然曰師失其道久矣今得進諸生而勉以聖賢之學豈不甚善於是嚴課程飭行檢循白鹿洞規條士風大振洎積四載接丁內外艱力行喪禮墨面柴背六年如一服闋補英山縣教諭重建學宮勸息爭訟作戒溺女歌設育嬰堂一本至誠不以微員而少

挫其志乙卯應聘楚闈得士一十人皆當時英才是年冬公車由漢江舟至青山遭風舟覆有漁人救援始免己丑陞鎮江府學教授歷俸既深於例應陞縣令猶陞郡博而達菴以義命自安無幾微見顏色士民攀留哭送至二百里外者其感人之切如此及抵京江修學官課士子如任績溪英山時余撫吳聞其名并閱其所著經解理學正宗喜其所學之醇因招至吳門紫陽書院令其督課諸生講明正學詎意茲秋染瘧不數日卒年七十有二闔郡紳士莫不咨嗟痛悼爲失賢師達菴之爲人自少至壯孳孳力學於書無所不讀且能以闡明聖道爲己任故其官不過一廣文而其志則以爲天下事莫非吾分內事諸如讓產濟貧置義田立義學設義冢一切善事罔不殫力爲之至於疏食糲袍而怡然自樂雖剛介性成或有時爲小人之所忌嫉而正人君子每爲之許可而悅服焉晚年著作益富凡發爲語言文字皆折衷乎濂洛關閩非其學之純品之正而誠之不可掩者歟故爲之傳由出意水代

蔡司訓志奇傳藍于秋

乾隆二年春余至瀋陽瀋陽距京師二千里江右至此幾六千里矣吾鄉官此土者治中永新楊君甯海今上猶蔡君暨余三人而已蔡君齒

神傳一百一十一

最少試政甯海三載京兆君宋公疏薦卽真初夏入京引而見道奉天一見如舊相識君爲人倜儻意氣豪邁爲余道乃祖庸子先生事甚奇先生少爲邑諸生康熙甲寅閒寇江右鄉曲亡命率乘勢煽亂恣虐善良所在多有先生屢瀕于危輒以援得脫往往出意外尤異者邑人以紳士中或勾賊爲亂偵得十餘人縛至學宮門外戮之仇家構陷先生入其中每戮一人先殺一鵝以祭隨斷其首次至先生鵝三受刃不死眾頗疑其冤時先生所聘李氏女未娶陷賊不屈死其母望見先生被誣且就戮頓仆號冤先生因得釋寇平以明經授承新訓導時承新人亦有通寇傾陷諸生者先生感已事爲力白其誣保全之然構陷先生者先生至老死不以語人也夫人死生之命制於天時當昏墊小人意天方亂命可逞其毒以加於君子然而不能也其死也或欲全其身以沮喪其神必有物焉持之俾得致命遂志必不使人得而刃之其生也或欲滅其身以汙其名必有物焉護之俾之歷百死蹈白刃而不危必不使人得而亡之其大較然也小人竟何能加於君子哉先生後復訓奉新致仕歸享年七十有三壽終於家子四人邑學生一人國學生一人鄉進士二人父諱希舜字仲韶由明經授推官值明季

隱居不仕著書號雲溪集子二人先生居長弟志廉舉人授始興令先

生諱志奇字庸子甯海其孫也覃恩贈如其官

史氏曰昔漢丙吉當封而疾甚宣帝憂其不起夏侯勝曰吉當不死聞

有陰德者必享其樂以及子孫信哉斯言也余觀蔡先生之為人蓋古

所謂長者以是歷險艱而不殆至絕口不言仇家尤人所難也其後之

昌也宜哉

張金友傳 隋元藻

金友字聲子同安西塘人九歲能詩父斯壩名諸生也日課以經史數

千字皆成誦年十六而孤遭兵燹託鎮軍幕府以自庇會草檄以其年

少不之祕也友從旁言其不可鎮軍大驚即屬署稿果稱意由是器重

之其母聞之曰童子饒舌禍胎從此始矣乃自韜廢後海氛再熾逆帥

聞其名欲致之因竄匿安溪山谷中數年迨閩疆底定登康熙庚申補

科賢書初選得湖廣司理會

國家裁汰是官改補仙游教諭時有縣胥凌諸生訟之宰宰右其胥欲

以闈堂罪禡諸生友力持不可既而將交額於上官因從容謂宰曰如

此必皆有譴第某黜為愛士公黜為底役輕重之際願明公熟思之宰

為改容乃直諸生又有巡司攝縣篆欲以縣堂責士召胥斗亟友爭曰

學政全書此地無責士體恐後以為例公何忍焉亦得罷巡撫李公以

友賢疏薦之友請歸養李不憚因備言母老薦經播鼯甫獲息喘不忍

遠離狀李為之泣下乃歸仙遊人勒石以誌不忘居鄉排難解紛族姓

無煩有司判牘者人咸重之稱為旋圃先生旋圃者友之書齋也年七

碑傳一百一十一

九

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

張伯行

獻零落之嘆世遠以狀來請曰願乞一言以誌不朽余誼不可辭謹按
行狀先生諱璧字君宏號武湖閩漳浦人也始祖蒙齋公宋理學名儒
自是科第不絕蔚為漳郡冠高祖諱大壯領嘉靖己酉鄉薦曾祖諱宗
禹萬曆辛丑進士官比部嘉言懿行載道南原委中祖諱一橙萬曆丙
午舉人累贈文林郎子三長而烜順治戊戌進士仲而煥順治壬辰進
士季而煜郡庠生以石德重望為鄉祭酒先生之父也先生幼有異質
九歲能屬文二十二補博士弟子員二十五選貢入成均時昆山徐相
國為大司成先生兩試皆第一聲震一時會耿逆變作留滯都門五年
不得歸一時賢豪皆與之交聞見由是益廣顧時時念三親不置或勸
之仕先生曰古人一日養不以三公換吾雞黍不能奉親何仕為丁巳
亂定歸里時二親避亂於梁山之麓先生竭力承志而益肆力於六經
子史四方來學者莫不以河汾龍門擬之二親既沒喪葬如禮丙戌授
羅源縣學博先生慨然曰天下治亂在人才人才盛衰由學校比來士
習驕矜為廣文者師道不立第省試文藝可否甚者徒博費餽以自利
而於長善救失之意微矣先生至羅盡革其陋習一意崇禮讓重廉節
而躬行以率之士莫不觀感興起諸學使按部見士之進止有度文義

傳一百一十一

十

斐然亟下檄褒先生余入閩廉知先生名使主書院事人慶得師先生
之學惟則古稱先不為勦竊之言表暴之行而人信服之蓋以德勝也
先生家素貧書院月餼無幾余屢欲有所贈恐傷其廉輒止欲循例疏
薦於朝以衰病辭先生之介潔恬淡殆有不可及者比余徙江蘇時先
生暫假省墓余臨行亟以書促駕先生惠然來省整頓師席如初庚寅
秋世遠得假歸省始奉先生歸里越一年先生竟以疾終於家之正寢
先生生於順治戊子二月初一日丑時卒於康熙辛卯七月初一日亥
時享年六十有四門弟子私謚曰恭靖先生娶陳氏柔順有賢德歸方
期年早卒繼室吳氏生三子長世遠字聞之己丑進士翰林院庶吉士
娶劉氏次鳴珂邑庠生娶王氏次可遠邑庠生娶黃氏女二人長適貢
生朱永泰次配林必藩孫四人女孫三人先生天性孝友清介絕俗與
人交則和平坦易藹然可親生平教人總以篤於倫理嚴於義利為諄
諄讀書限以工程曰學貴有序無序者雖務多無益也又曰見古人之
行事立言而反求諸己其流於不肖者鮮矣其論說事理指陳得失皆
可見之施行惜其事業不見於世然其潛德隱行惟夜光之璧差可比
擬乎其沒也安溪李相國以文唁之曰人倫必有師表鄉國必有典型

先生之存也或稱之為胡安定或擬之於黃叔度或品目之為李元禮
郭林宗名不虛立信夫余撫閩三載得先生互相討論自至江蘇齋廡
不忘乃今不得復見悲哉世遠等既得吉兆於某原將於月日葬先生
原配陳孺人耐焉因略舉其概而為之銘銘曰
先生之名不必顯於時而可述之後世先生之學不必售於已而可傳
之來裔此非緣飾儒術者之所能為唯其真修實踐故能如是默與道
契也梁山之高實為邦望鹿溪之脈其流決決於此遯形與天地長於
日月光千秋而後視此蓋藏

文林郎嵩縣儒學教諭傅君上襄元配范孺人合葬墓誌銘 張伯行
余表姪蘭邑匡山傅君余祖母之曾姪孫也長於余三年余少時每至
蘭登堂拜表伯左子公暨表兄止園先生退即與匡山坐書室談文講
道惓惓不忍去後余因家務繁冗讀書其家益得與匡山接席聯牀動
靜與俱乃盡有以識匡山之所志所學蓋難於今人中求之也爾時余
方為諸生而匡山已領鄉薦余謂匡山獲售南宮干霄直上在指顧間
而蘭之先達梁奉常張大參諸公亦皆以翰苑目之奈匡山命運乖蹇
屢試禮闈不第癸亥遂以廣文小就而乙丑後余亦宦遊於燕齊吳閩

碑一百一十一

之閒不相見者三十餘年每當公務之暇獨居靜坐憶及昔日相對時
猶覺神氣靜穆丰度端凝千里可接方期數年後歸老林泉與匡山把
臂談心為暮年之樂而不意匡山已於己未秋告終高署矣嗚呼如匡
山者乃竟以廣文終耶雖匡山能以義命自安亦不以是而加損而天
之所以位置匡山者豈應若是已耶今其嗣君靜來將奉匡山之靈而
葬焉遣使持狀請余為之誌其墓余知匡山最悉欲表章之也久矣又
何敢以不文辭按狀匡山諱上襄字渡平余外曾祖淇縣教諭明經宗
孔公之元孫萬歷戊午舉人翔宇公之曾孫鄉飲正賓太學生左子公
之孫甲午拔貢止園先生之冢子也生而聰穎異常出語輒驚人左子
公珍愛之及長下帷苦功難嚴寒盛暑誦讀不輟為文力追先正不逐
時好尤工書法精詩律十七補邑博士弟子員己酉年甫廿二遂領鄉
薦當是時左子公春秋高喜而顧止園先生曰吾家賦鹿鳴者有之冥
瓊林者無人此子庶破吾家天荒乎豈意匡山之終艱於一第耶匡山
性至孝事祖父母父母先意承志備盡色養當庚申止園先生之捐館
也擗踊哭泣淚盡血繼三日勺水不入口左子公曲為勸解方少進食
居喪三年曲盡禮節及丁卯戊辰連遭左子公王太孺人之喪身居承

重亦復盡哀盡禮丁丑下太孺人卽世哀毀骨立幾至滅性若其撫幼恤孀不貽父母憂則又孝友並至云三任學博率以興學造士爲先務立社主盟多方鼓舞以故所至人文蔚起在柘則丁卯中式者五人皆其門下士在嵩則戊子中式者屈君寬張君星煜尤其所最心賞者先是嵩之魁樓久壞匡山首倡捐修卽以屈張督其工落成之後題其門云魁曜臨三閭文光照兩銘迨戊子榜發而二君果破壁高飛入服其藻鑑焉戊寅己卯在里守制讀禮之餘立心行社邑中知名士遊其門者爭自奮勵相繼獲售者指不勝屈生平不治生產不趨時附勢嘗聞其病中答某詩云田園半廢恆心在肌肉全消傲骨存其清高之品端嚴之氣於此可想見矣匡山生於順治戊子年三月初八日午時卒於康熙乙未年九月二十五日酉時得壽六十八歲配范孺人邑明經范公諱龍驥女幼失恃從父受內則閨範列女傳諸書寓目卽曉大義凡一言一動莫不循循有規矩于歸匡山後事舅姑以孝相夫子以勤處如婢以和教子睦族持家御下種種懿行皆足爲姻黨矜式古之內助賢媛何以加茲孺人生於順治己丑年十二月二十四日戌時卒於康熙辛巳年五月十二日未時得壽五十三歲生子一馴邑增廣生娶張

氏候選知縣康熙乙卯科舉人張公劭女繼娶太學生馮公宗崇女女

二長適邑廩膳生史公崇雅男庠生維綱次適江南廬州府廬江縣知

縣順治丁酉科舉人儀封王公仁深男太學生廷模孫四人長義方邑

增廣生娶太學生范公宏受女繼娶文學惠公聲廣女繼娶文學李公

宏烈女張氏出次甯方聘太學生李公均女次通方聘候選知縣康熙

乙酉科舉人韓公懿女次經方聘邑增廣生范公宏仁女馮氏出曾孫

二長專聘太學生范公延先女范氏出次傳聘文學李公世簪女李氏

出備誌之而系以銘銘曰

大河之許篤生名賢人切斗山之仰世慶鳳圖之占躬盛德者宜受天

祐而竟得此屯適豈不終其身必於其子孫食報愈遲則愈長而不必

盡在平生前不然胡爲乎以公輔之器而終老乎一甌

程氏兩學博傳劉自謙

程可順 鵬舉
程可順字孝先子鵬舉字亮四孟縣人兩程夫子後也始祖自嵩縣遷於孟遂家焉孝先生有勇力喜讀書晝則會集諸友學射挽弓三十餘夜則焚膏繼晷三更猶聞鉛槧聲或謂之曰君讀書不可及矣古者射

以觀德乃以力勝耶答曰天下將亂以爲備耳天崇開所在盜起團練義勇卒眾宿濠下手持孝經一冊聲朗朗然賊怪之無敢窺者時都圖多逃竄惟其里安堵如故以明經爲咸陽訓導教諸弟子不爲舉子業惟於月吉令各述所事及所酬接檢點其言行常謂人曰凡學者所以學爲忠與孝也只此一句終身受用不盡雕蟲篆刻雖巧奪天孫何益乎自榜其堂曰退思蓋此意也生平負義慷慨事親以孝聞年七十一歿邑令旌其門著有退思堂集三卷行世亮四精岐伯術病垂死者應手而愈常曰使千百人委我以生活計皆手自調治當使時相不問牛喘其自信如此以明經爲夏邑訓導康熙四十八年歲大饑歸德守陳堯策委以賑荒事且命曰疾起之不則填溝壑矣徐對曰計某所履地八百餘家緩至十日後未爲晚也守愕然又對曰剋期五日何如守勉應曰諾乃晝夜行泥淖中親爲察其虛實謂守曰可矣先是守以糧若干付克四訝其多至是僅計若干守不喻也令下親爲持斗斛貧者大二鬴歡聲如雷富戶無敢濫邀者他邑或倍之猶未均也四十九年大疫請於守得若干緡又自捐三百餘金修合藥餌親歷鄉邑閒散給之疫息是歲大稔守大奇之曰全活者奚止千百人耶他邑皆患苦是獨

碑傳一百一十一

無恙不問牛喘其言信然矣又請於守創修東門外石路高五尺長二百丈督修聖廟捐俸栽樹百餘株尋陞上蔡教諭守令交薦之以老病辭著有萱堂集夢餘草行世生平篤恩義事親孝母韓氏年九十九邑人歌曰河陽縣河陽縣程公孝母幾百年五世同居眞稀罕年七十九以壽終生子四人珺恩垣坦長有父風克述祖德季爲伊川先生博士邑人稱程氏者必先學博父子以程氏兩夫子後亦號爲程氏兩學博云

內邱縣儒學教諭李君國碩墓志銘

李鼎

四十八

年

李君諱國碩字簡臣以選拔貢生康熙四十八年選內邱縣教諭君不自閒其官修學宮自其邑安平置文廟祭器百餘事齋至內邑課諸生以文行暇則與之賦詩道志由是人文丕變會五十年奉

旨蠲畿輔民糧乃內邱令以比歲不登多連賦催科加亟日敲扑民鼎

沸相牽運坏木砌縣衙門令倉皇无措君聞急往視諭以上下大義民

乃解適分巡大名道甲過內邱民聚馬首呼冤令懼私勾甲執呼冤者

繫之獄且謂必有矜生唆之鼠數名呈甲甲呼君讓以不能束土君憫

然正色曰民填溝壑而號呼誰能禁之而安事唆之諸生何尤且碩不

能東士罪也願投簪甲爲之壽威置諸生不問而去至栢鄉使人召君
意情之爲邑令調停也君揖使者曰吾老矣乞休矣不長于奔走無以
奉命遂告休次年夏旋里將行之夕忽聞門外大呼且哭君驚起偵之
則成碑人焚香叩送者及出郭士民攜觴泣別羣擁馬前不得行予嘗
謂官人要職惟冢宰與縣師冢宰在上位進退人才者也縣師在下位
教育人才者也而今最閒無事亦惟此二職冢宰不復問選人賢否惟
立簿列年分先後爲用次縣師懨懨閒坐終歲不一教士此文衡案臨
造冊齋送如此則置書吏辦之皆可報稱奚事贅官乃君獨改轍造士
且復留心民瘼其不合而歸宜也君先世以文行相嬗淳歷仕途君守
身孝養爲邑人捍災患一遵先人躬訓諸子俱積學康熙癸巳科或
謂曰諸公子文張甚而屢躋皆謄錄人潦草誤之也近有賄謄錄者盡
效之君曰不可是以賄進也旣而是科謄錄賄發而子用舍入穀君諭
諸子曰履正不亦獲耶僥倖甯有濟耶鑒之率祖攸行無忘於戲君之
守正素矣配某子五人用晦用敷用舍用煦用弘女五人孫七人享年
七十有二將葬也晦衰經匍匐求銘銘曰
職之任時之宜不周而去奚其悲呼池之旁君子之藏白楊風起苟無

戕兮

俞學博廷棟傳 沈德甫

俞先生諱廷棟字禾懷號松千崑山人祖諱廣颺父諱允升砥志儒術

母王孺人生先生四歲而沒繼金孺人先生少穎悟祖授以四子書數

行並下稍長從婦兄遊刻苦向學年十八補郡學生旣穿穴經籍根柢

深固已卯韓城張公景峯保德姜公崑麓典江南試榜稱得人先生出

潛山令張漪園門祖年老尙及見之曰吾家代有隱德理當興起若登

賢書吾有孫矣禮闈不第歸義命自安杜門掃軌時韓城保德兩公視

學江浙不通札千請或諷奉堂上甘旨不妨稍貶孤介先生曰我修南

陔白華之養焉敢違潔白之義有點我親且不願一己烏哺之私爲兩

師門累也邑中諸前哲交口推重丙申就選得安慶桐城縣教諭例當
引
見入都謁今相國硯齋張公公雅量清望手卮酒勸以師道自任旣之
桐進諸生講道藝重經學祛浮華勵名節養士氣遠近翕然每課士鄰
邑廩至學舍幾不能容所陶鑄多成國器君而先生峻節自矢雖盤殮
不給於常俸外不名一錢邑中賢大夫交口推重一如在崑邑時初先

碑傳一百一十一

十四

生之任拜辭堂上受清慎二字以行及計典列上考署曰守清才裕父聞之喜曰若遵吾言吾有子矣歲己亥修葺學宮身先倡率郡守委修邑志徵文考獻釐綱析目具有史裁緣母喪去官未及成書抵家復丁外艱先生故仁孝之官後所夕懸念時遣子歸侍代定省至是兩遭大故衰經中經營窳窳不自衛生形神並槁矣雍正二年甲辰三月卒距生康熙四十年六十性友愛待兩弟頗登瀛公衣漚食撫姪雲耕如己子王子雲耕舉於鄉先生教也生平不言人過而涇渭了然友朋有急多方周之偶無以應即輦賤不自安於古文嗜左史昌黎制義一宗先正嘗言吾輩須讀有用書作有用文乃不虛此日綜其畢生蓋敦本篤實君子也雖位不副德未究底蘊而有行有文如此亦可傳也已配張孺人事親治家皆中禮節以高壽邀賜粟帛子二人神發太學生祥發縣學生女一人孫男女九人論曰古來廣文首稱胡安定公以經義治事教弟子俾出而從政多適於世用也今此風邈矣然端已率物清節自樹若俞先生者亦胡可少也居家峻整鄉國並稱而筮仕以後又能樂官之閒而不忘師道之尊行藏出處兩無負矣嗚呼美名尊行果在大官厚祿中哉

陳鶴齡傳 王安國

神傳一百一十一

五

先生姓陳氏諱鶴齡字鳴九直隸安州人父諱澎個儻好義負海內重望從容城孫徵君遊先生少承庭訓以故有得於濂洛之緒好讀河津姚江二子書及其鄉鹿忠節公論學等編而以身體認之父沒家業中落故舊有某某者巧奪其產先生恬然予之弗與校事母以至孝聞啜菽飲水外內無閒言康熙甲子舉於鄉高陽相國李文勤公夙重先生之爲人至是延至京師館於其家先生念母篤老輒謝歸設教家塾從遊者數十人每秋冬篝燈夜讀聲滿里巷母歿選授正定縣教諭效胡安定公法舉行條約教諸生孝弟力田治經史暇則習射以文藝進者請益焉正定學宮舊粗完歷歲爲風雨所摧傾圮殆盡先生蒿目憂之毅然謀修葺鳩工之始釀金無幾而先生獨以力任邑人重先生之義羣輸資以助踰年落成勒石以紀其事淳沲泛溢嘗奉檄視沿河村堡水災有密授意謂宜以不成災報者先生詣其地蹙然曰百姓嗷嗷待哺吾目擊情形而諱不以告負此心矣卒以災報蒙賑恤全活者數千家又太守命督隆平甯晉諸邑民蝗時捕蝗令急所在騷擾先生旬日

歸太守問狀先生曰蝗不食苗苗已盡民不畏蝗官卽蝗也太守迂其
言然終以此重之既遷順天府武學教授掌義學事其訓迪一如正定
雍正四年以疾卒於官先生表裏粹然踐履篤實素精舉業六試於禮
部凡五薦皆不第而經先生講授者率列庠序及獲掇科名者指不勝
屈教人務盡其誠而行之以恕聞人片善輒獎勵不置有不率者以理
婉諭之久乃薰之而化在家在官凡涉人身名事以言語扶持愛護者
甚夥嘗對人曰某平生不道人非樂成人美默默此心天鑒之矣歿之
日遠近之士咸聞而悲之赴葬者數百人其門人李鈞張誌請於其友
李塚方苞私諡爲懿長先生子三惠榮惠華惠正惠華登上第惠榮惠
正俱成進士

學博陳君熊墓誌銘 沈德潛

明永樂時吾吳有怡庵陳公諱繼者以孝德經學顯宣德初徵至京授
翰林院檢討天下稱陳五經先生爲邦國光歷十傳爲州司馬公搢先
生又一傳卽司訓竹廬先生皆不愧五經後人者也子與陳氏稱世好
嘗誌公搢先生墓至是司訓諸嗣前已葬其親矣緣誌石未立又請誼
不獲辭陳氏世系具見公搢先生誌中先生生四子竹廬其長也名熊

碑傳一百一十一

其

字渭占少穎悟年舞勺補郡學生時吳中有慎交同聲二社竹廬以少
年入慎交社錚錚有聲康熙己未貢成均大司成器重之文譽罕儷羣
謂科第可戾契致而竹廬念親老不忍久離再試不遇翻然歸旣歸會
遭母喪三年哀禮兼盡壬午除廣德州建平縣訓導閱二年丁外艱哀
毀逾節一如喪母時服闋補江甯之溧水歷十九季歸前後司訓其二
十有一年方之建平也建平僻壤無學人從前司教者以不足教任其
荒嬉竹廬曰吾敢如崔斯立哦松廢事乎爲廣設科條朔望集諸生講
授諸經自是士知碩學登甲乙科者相望前此未嘗有也任溧水成就
尤多溧放中學竹廬教舞振作倍於建平時人文日上力請於學使者
得加額視上學學舍將圯又聖廟東向非制乃規觀察故署倡諸生重
建廟貌遙新董學者絃誦其中不躁不怠土歌之曰前端仁後竹廬紹
白鹿追蘇湖端仁門人私諡姓吳名愉吾鄉有道君子先竹廬秉鐸於
溧者也竹廬獨齋喜種竹弟子取以爲先生號表其清節與鄉先哲比
德云前後屠署攜一蒼頭二童子自隨無事鍵戶治經尤嗜易嘗曰易
者諸經總會天時人事吉凶悔吝之幾寓焉易理明諸經如剗竹矣禪
躬一言一動期於寡過得力於易者居多此五經先生遺範也生平敦

倫紀慎言行溧水歸後凡十有四年厚德清望人以陳仲弓目之乾隆三年五月二十六日終於家季七十九以叔子官封登仕郎配裴孺人閑家有則先八年卒合葬於穹窿山之原子四人泰來太學生祖謨長庠生履中以治河績官河南蘭陽簿今補山東單縣簿萃正早卒女子四人並適名族孫五人萬齡附監生萬選府學生早卒在鎬州吏目崧長洲歲貢生工詩曾孫四人憶子年二十時謁公搢先生於碧鳳坊後得交竹廬昆季竹廬貢成均時余爲諸生後十餘年公搢先生卒哭之又三十年爲草志石今又閱十五年爲竹廬草志約計五十餘年吳中文獻凋落親知祖謝何可勝道而於君家得交祖孫父子且銘其再世之墓誼獨厚焉郎子亦忽忽其衰老矣此其尤可感愴也夫銘曰

五經裔十一世通經學美克濟揭德振華人師不媿鍾吾高原安魄地山皐崑水溶瀟君子之澤永勿替也

儒林郎江南溧陽縣教諭韋君前謨墓誌銘

劉綸

乾隆二十八年癸未上策天下貢士於廷蕪湖韋子謙恆由南巡召試賜舉人官中書至是

碑傳一百十一

七

制一甲三人進士及第授翰林編修時予以讀卷官再充教習庶吉士韋子旣旅晉卒業則越席抱狀請曰吾先君之殉垂二十年生平學術官方流被人口願乞一言納諸篋而同館鄉先輩具言韋子樸誠士不敢以溢詞欺親先生毋固辭乃摭其行實之大者誌而系之以銘誌曰君諱前謨字儀哲號鐵夫先世當宋南渡時有隱君諱許者自江西卜居蕪湖累傳至公高祖贈文林郎諱受薦曾祖封朝議大夫諱一教祖順治乙未進士歷官吏部考功司郎中諱弦佩考授文林郎知河南新鄭縣事諱聖功所至具有聲蹟君以名家子治經曉師法年十七補學官弟子員五試不得解乃以廩貢注泗州訓導歷金壇訓導遷溧陽教諭尋移病以歸君生平課諸生必首告之曰膚學飾經義亡實用其弊視荒經爲甚爾諸生勿蹈此諸生有內行不謹者所聞得實當庭跪其斥之其人嘿感悔無後言溧陽王生某者其弟卒官武城令比喪歸遺孤瘞殤於疹丹徒陳生故與王某郊遂以圖產謀殺介府教授屬君納其贖申治之君峻卻不撓而訓導某獨牒上有司窮治不得實然王氏以延累家竟破後兩學官次第暴疾荒忽呼王武城而斃君願家人曰我嚮不受賕義自應爾孰謂真謫不爽其信且速如是先是泗州積被

水額賦以次報蠲後水勢寢落有司籍上涸出新淤二則分年復業並請增設潼安衛理其事君奉調佐邑令勘實條具奸胥舞文狀甚悉大指請除一地兩科已報淤復報涸與報涸而實未涸者大吏采以入告詔報可汰冗官釐正課歲減溢額租七千有奇民以爲便夫府州縣學宮儲材之藪也教授學正教諭訓導人師之範也其秩輕其守重士大夫顧以早歲不獲躋通顯往往需次至氣衰日暮不得已俛首狎就之詬詈者且目爲瞻貧優老地而上官亦僅憐其投閒戀棧不復以課最關之卽不自菲薄無以揚其職觀君在官所自效其有不泯顏浹背庶斬一雪斯言者哉君至性過人遘古太安人暨新鄭公之喪皆盡哀盡禮以弟病乏嗣立遣三子成龍爲之後殮葬悉以身肩之晚繪授經圖一垂髫負劍捧書其側編修君也其志行醇茂爲學術官方之本蓋如此君生於康熙某年月日卒於乾隆某年月日得年六十有六配甘安人繼周安人並有壺範先君卒生子七長天棟乾隆丁卯舉人次天棟縣學生成龍出爲季父後皆甘安人出次卽編修君謙恆次縣學生震蒙次履泰次鼎復皆周安人出女三孫八孫女六曾孫二曾孫女一以某年月日葬某山之阡銘曰

匪道奚蹈匪教曷造嗚呼君乎神所勞其甯弗攫其貞用亨嗚呼君乎

天所旌

碑傳一百十一

六

五

父教諭韋君傳 彭啟豐
韋君諱前謨字儀詰安徽蕪湖人祖諱苴佩順治開中進士官吏部郎中祀名宦鄉賢父諱聖功以貢生知河南新鄭縣韋氏世以治經爲業至君益欲推所學大施于時雍正元年以歲貢生爲泗州訓導師道自嚴召諸生講藝進其賢者能者而勸導其不率者必使之悔悟自奮乃已縣有楊生數忤其父君爲閉譬至再四楊生大感慟折節自改及君去官楊攀輿而泣且曰微師吾終不可爲人矣遇水旱賑卹輒微服涸鄉人問問所疾苦畢得其幽隱從而酌劑益損之眾皆服無敢欺冒者康熙間泗水有
詔除其賦至雍正五年而報淤報涸者紛起吏因緣爲姦又添設潼安衛追徵積逋民苦之已而
詔下有司清丈其地畝君因公委密爲條議分析一地兩糧及無地存糧者共若干頃陳之副使何君宗韓並請裁衛以便民何君竟据之以聞遂得減歲賦七千兩有奇而潼安衛亦罷七年以父憂免十年服除

補金壇訓導卻私饋金壇學生畏慕之遷溧陽教諭又二年以疾歸年六十六終于家子七人天棟舉人早卒謙恆一甲進士官編修贊曰先儒有言一命之士苟存心愛物于物必有所濟信夫若韋君者唯其所存者深也其有得于治經之功與何君宗韓可謂知韋君者矣乃竟無薦達之言何哉

祥符教諭呂君灑曾墓誌銘

陳浩撰

君姓呂氏諱灑曾字宗則號力園余同年友松坪方伯之從兄也戊寅余遊大梁松坪歿已十有八年其子公溥偕其世父靖州刺史伊蔚之子公滋從余學因持刺史所述力園行狀而乞銘於余呂氏自北宋時卽爲中州文獻至明太傅忠節公實爲新安呂氏大宗忠節公生侍御公侍御公生四子仲爲司農公諱履恆伊蔚松坪皆司農公子而君則拔貢生儀封教諭諱復恆之長子也前母傅孺人無出母爲蕭孺人生君及兩弟循曾仰曾君性質鈍而勤於學其於力行必蹈其實而未嘗麗於私某年司農公以分補戶部公項萬五千兩計罄其產不能支君卽先鬻己之田以助之并爲其弟經理生計舅氏蕭叔佩有詩名以窮寓江左君使人迎以養之舅歿又字其子焉君以康熙癸巳科舉於鄉

碑傳一百一十一

十九

將選縣令以母老不欲遠仕請改選得祥符教諭遂迎太夫人於開封居數年太孺人歸君以長官委辦捕蝗不得隨侍旋以母憂去哀毀成疾而卒方君之未仕也家居治小圃植蔬果花木以娛其親因教子弟及其鄉人數十餘年伊蔚與松坪皆從君學者余旣與松坪爲同年友聞君之學行於三十年之前而今公溥公滋復朝夕爲余述之刺史伊蔚篤行君子也今據其文著君之生平獨存其大略如此君生於康熙某年月日卒於乾隆十五年月日年六十有七娶郭氏無子以從兄章範之子公詒爲之後公詒中乾隆辛酉科舉入後公三年歿有子中君所著有韻可百六卷詩賦若干卷制藝若干篇以乾隆某年月日葬於某原銘曰

有以待物外無所施名不耀世而家是宜邨山之側澗水之涯旣固且安君其妥而

錫山縣教諭謝先生晉行狀

邵齊憲撰

先生姓謝氏諱晉字日三蘇州常熟人祖爾綱父錫蕃贈文林郎康熙

十九年大水歲饑先生祖爲粥食餓者時先生年五歲進曰糜薄恐不飽又不得懷去不若易以餅祖大奇之從其言全活甚眾年十七補博

士弟子試輒高等及入成均屢冠其曹年四十九中雍正甲辰科順天第五名舉人會試取明通榜歸教授於家先生爲人和平樂易篤於倫理居家常以孝弟敦厚爲教侍母病衣不解帶者經歷年載兄毅字心遠邑庠生弟發字叔起丙辰舉人推肥處瘡發於中誠友于式好至老無閒從弟子景運幼孤露育於先生提携成立視均已子少受業同邑陳溥陳歿爲造塋冢與同學五十餘人執紼送葬其篤於誼如此在場屋三十年經史古文手自抄撰研精探索寒暑不輟爲文章精詣充實理法純密既魁京兆所試墨裁遠近傳誦及歸從學者日進先生指示程準剖析奧窔誘掖不倦多所成就乙卯丙辰之閒舉場文體一變其舊末學膚受不循其本競構詭異冀以逢世鄙忽先進目爲常譚先生教人常隨時適變而不失其正執經之士前後百數十餘年登科第者相望門牆之盛同時罕及乾隆五年年六十五由丁巳明通選徐州碭山縣教諭碭之諸生積爲隸役之所魚肉先生至所以扶樹之甚力時患蝗縣令教諸生各出掩捕一生病不出隸輒迫辱之先生謁令令方憂蝗甚先生曰隸之害民酷於蝗蝗易除未足憂也令爲稍戢其隸又于生者納租已畢隸猶索錢不已大見詬辱反誣生以罪令怒將笞

碑傳一百一十一

生先生曰徐之且勿盛怒令惠曰師何意罪我以怒先生曰喜怒哀樂情也人所當有苟發而中節則怒亦和耳令意解乃釋于生方是時隸役橫甚士之富厚者必以計攫其資貧者或恥爲之下卽立具罪名恣意凌折之薄物細故皆成瘡疣構飾疑似詞牒旁午先生深不平之後大司成崔公紀來督學司成素方嚴先生因上謁極論其害乃令諸生嘗見枉陷者悉以狀自列學政學政下其事教諭先生一一直之以上司成大怒飭郡守按驗諸奸猾悉伏其罪士氣爲之一振於是諸生恃先生若慈父母矣先生在碭山八年訓課不倦貧者恆賑給之有汪鳳翥者幼孤黃圃文者本農家子此兩人尤貧困以童子來請益先生招致官廨衣食而教誨之三年皆補弟子員先生嘗受郡記與令分道捕蝗當至南鄉禱於猛將廟而往於時羣飛蔽空聲如殷雷乃命召徒眾掘溝塹設置綱具竿挺須黎明畢會及旦視之蝗盡墮地死數十里無一飛者士人陳鳳卜家有狐祟巫祝禱祀莫能祛祓先生至揖而祭之命虛一室處焉自爾寂然家以獲甯乾隆十二年以老乞歸牘屢上郡守定公長以先生尙強堪任職疑有所齟齬遣教授從容問所以欲去官意先生慨然曰吾年踰七十幸筋力尙健願我兄弟三人弟以計偕

得數過此兄耄矣獨不能來念相見無時何能貪願微祿使白首抱完山分飛之恨乎郡守爲感動乃許焉先生既得請以是年六月束裝諸生更留行復居月餘比發生徒傾邑送於河干服青衿而列拜者三十里不絕初先生出行城南遭子母相毆者停肩粵問之其子傲然曰素非相屬能難我耶先生怒執而撻之令縛送縣令治其罪其人始懼而求免先生爲開示大義反覆訓諭而去縣令聞之晨造先生自以化導無素引咎愧謝後其人感悟更爲善良娶妻成家供養有加聞先生歸母子追送出郊鄭重拜謝縣令者三韓鄔君名承顯嚴猛有吏幹先生與爭諸生曲直數相抗初怏然察先生所言公後更見敬信命其子受業於先生之子祖庚遂相與結交先生家故貧居頃之祖庚以舉人選授處州雲和令雲和富人坐法當抵罪走常熱行錢先生正色拒之凡再至卒不納數赦祖庚宜務廉慎勿飭法亦終不言富人事乾隆十六年蒸遇

皇太后萬壽

推恩中外先生以祖庚官封文林郎祖庚在雲和五年以勞次調甯波奉化令未數月有獄囚病死其家請而殮之坐不檢驗奪職先生聞未

嘗戚戚乾隆二十二年

聖諭十六條衍義

詔賜先生緞一端復祖庚官初先生年十五六多疾患母黃夫人誠曰汝血氣浸長而羸瘠若此一不慎恐旦夕不自保先生受誠加意攝護弱冠以後體更充實竟獲遐壽既耄飲噉日進齒牙未嘗動搖後進以文字請業者手披口講無厭怠如壯盛時庚午壬申祖庚連充浙江同考官迎先生至錢塘既撤圍祖庚率其門生謁見奉觴上壽侍遊六橋先生鬚眉皓然策杖登陟彌日欣暢曾無倦色自先生去碭山歸優游家園垂二十年安分忘貧以文自娛壽考康強儀型縉紳四方士友相見必問勉廬無恙爭欲知其起居服食其相傳說以爲稀有勉廬者先生所讀書室也乾隆三十年閏二月初九日無疾卒年九十先生娶姚氏先先生卒贈孺人側室陳氏以子貴封孺人子一卽祖庚乾隆戊午舉人浙江奉化縣知縣孫二曾孫四先生以醇德宿齒爲鄉黨之所尊事文章行誼皆可表見於後宜請當代哲匠刻畫碑誌垂耀泉壤及載郡邑志乘使來者有所考信觀法齊肅幼以愚彥忝侍函丈敢就聞見

所逮參以先生所著年譜撰次梗概冀備采擇謹狀

舍山縣訓導蔡先生龍墓志銘

王頌

先生蔡氏名龍字文舟世爲江南崇明縣人遷于崑山先生自弱冠則已補蘇州府學廩生從何義門焯張岳未景崧游以是益有聲庠序間先生居崑山茜墩茜墩東距嘉定之安亭四十里稍北與亭林相接安亭故歸震川太僕所居而亭林者顧處士炎武生于此兩公流風遺行茜墩人往往能傳之故先生之學私淑于兩公爲多先生爲人質懇寡嗜愆教人以盡理敦誠樸躬行實踐讀書好古爲宗其輕儇巧黠者雖敏悟必以夏楚收其威望之色粹然聽其言訥然爲文古澹質實如其人自蕪壞遷于青浦之珠街里從游日益眾學官弟子稍知名者皆經其指畫講授然屢試不遇卒以歲貢生任舍山縣學訓導先生在舍山益以師道爲己任又聚諸生而講學焉其諄懇深至聞而讐服警悟痛自刮磨瀟濯者不可勝數管與諸生讀後漢書范式傳迴翔循誦聲哀厲至于泣下有諸生魏某在坐忽起而揖曰某與某生夙相好也以田故將訟諸縣官今聞古人行誼如此自媿且悔遽出訟牒于懷壞之其至誠感發人多此類也先生曾祖某祖鈐皆不仕父廷傑某縣學生配

碑傳一百一十一

孺人張氏子一照新陽縣學生女一適崑山縣學生郁郁文先生在舍山五年教大行以年老告歸歸六年乾隆丙戌三月初九日未時病卒于珠街里距生于康熙乙丑某月某日年八十有一蓋自先生歿而東南敦龐耆碩之士盡矣是年十一月照奉其柩窆于長洲縣之觀音山祖塋南若干步以予受業于先生久知先生行事爲詳使銘以刻諸幽

銘曰

伊古勸學必以道俱輦悅其文儒術乃逾維此歸願百世之模迹其微言過頑訂愚弗耀而窮云何其吁先生之教在誠中孚我斲銘詞敢失以誣

修職佐郎狄道州儒學訓導李君法墓表

張淵

往予未第時葢肄業關中書院云則制府相國尹文端公撫軍相國陳文恭公督學洗馬官清溪先生皆名德碩儒相與致敬盡禮尊師重道故其時主講席者爲我武功太史孫酉峯先生研精覃思邃入理窟一時受業者計數十百人其最著則大荔李法維則淮南薛宁廷退思武威孫備仲山華陰李汝榛仲山華州王士葵蘭圃韓城王燕偉人咸甯邵麟趾仁履臨潼王巡泰岱宗綏德張崧雄五污縣嚴慶雲霽如乾州

馬友蘭素天楊橋漢升扶風馬用觀顛若姪廷榴安石後又有綬德張
秉愚葆靈秉謙益亭榆林葉蘭湘佩姪玉樹德潤皆一時英雋奇傑之
士相與講明經術攻制義論策詩賦雜文皆有可觀先是丁卯鄉試子
與維則俱以戴記同受知同考官富平令遷興安州牧李公卅垣俱不
售至是聚首雅相知也自時厥後退思由庶吉士官編修蘭圃由庶吉
士歷官刑部郎中提學貴州倖人由修撰累遷刑部侍郎葆靈由庶吉
士官編修轉四川道監察御史湘佩由中正榜爲內閣中書舍人餘皆
由進士鄉舉爲州邑牧令官獨維則僅由歲貢生選授狄道州訓導訓
導數年年且七十猶閒闕數千里赴西安應布政司試辛卯八月子以
外艱除服北上謁銓部晤維則西安逆旅鬚鬢蹇然精力殊健子曰
老當益壯固君謂哉維則自以不預科名憾甚軀太息至泣下子期以
必售爲慰藉者久之因句其文表先君墓道而維則亦謂子序其所刻
南槐詩集各皆允諾遂別去乃無何秋聞報罷又明年維則卒矣生康
熙壬寅某月日卒乾隆癸巳某月日其子某以是年月日歸葬大荔維
則文學馬遷詩似太白自餘不屑也爲諸生時清溪先生於眾中獨指
目爲天下士顧終老不獲一第至齋志以及悲夫所著有南槐詩集文
集及制義若干卷其所爲康對山救李空同論擬修杜工部祠堂記等
篇激昂抗概意興勃發論議層出俯仰情深西峯先生每歎賞不置尤
膾炙人口也

碑傳一百十一

碑傳集卷一百十二目錄

校官下

劉先生大槩墓誌銘 吳定

又劉海峯先生傳 姚鏞

朱先生仕琇行狀 喬仕曠

又朱梅崖先生墓誌銘 朱筠

瀘溪縣儒學教諭金谿楊先生芳墓誌銘 魯仕曠

李保康君岐生墓誌銘 張遠覽

王先生士芳傳 沈大成

李先生觀瀛傳 韓夢周

又萊蕪縣教諭十洲李君佚事 法坤宏

潘氏四學博合傳 潘挺奎

潘惟相

潘林

潘醞德

潘中吉

張學博大烈傳 潘挺奎 碑傳一百十二日

彰德府林縣訓導余公瑄誌銘 崇士鏡

故三原縣司訓康公紹衣墓誌銘 康清

敕授修職郎定番州學正晉贈儒林郎翰林院庶吉士張公德異墓表 文翰

新會縣教諭前署福建甯洋縣知縣吳君槐炳墓誌銘 陳昌齊

敕授文林郎安溪縣學教諭謝君金鑾墓誌銘 陳壽祺

王先生國瑞墓表 馬名駒

臺灣縣學教諭推陞泉州府學教授鄭君兼才墓誌銘 陳壽祺

碑傳集卷一百十二

嘉興錢儀吉纂錄

校官下

劉先生大榭墓誌銘 吳亮

先生姓劉氏諱大榭字耕南號海峯桐城人也曾祖曰耀明崇禎時以貢士廷試授歙縣訓導祖姓父住皆縣學生先生狀貌豐偉而性情直諒寬博讀書工辭章之學自古文亡於南宋前明歸太僕震川暨我朝方侍郎靈皋繼作重起其衰至先生大振其才之雄兼集莊騷左史韓柳歐曾蘇王之能瑰奇恣睢鏗鏘絢爛足使震川靈皋驚退改色詩亦孕育百氏供我使令元明以來辭章之盛未有盛於先生者也年二十九應舉入京師巨公貴人皆驚駭其文而尤見賞於方侍郎暨吳荆山閣學以為昌黎復出已而兩中副榜貢生以終乾隆之初邵開府余京兆欲薦先生賢良方正辭會舉博學宏詞方侍郎以先生薦及試為大學士張文和所黜而文和後大悔洎乾隆十五年詔舉經學文和獨舉先生而文和旋去位乃出為教諭於黟黟士至今感誦先生教育之仁不息

碑傳一百十二

國家用經學選天下士而先生以振古之文生於

列聖相承文教累洽之日又有持權者為之引延而卒之淪溺下僚不獲展其才以沒則信乎命之窮也然而富貴之榮沒則寂焉斗筲之功名亦澤竭則忘焉天地之光華一日不掩則先生之文章一日不磨畀先生以曠世不數畀之才而特假巖壑寬閒之歲月以成先生千古之榮天之眷佑之者至矣即使先生數奇屈於生復屈於死卒致泯沒無聞而先生之可不朽乎此生者自在也其又奚懟焉所著有詩文集已行世其卒也以乾隆四十四年十月初八日年八十有二娶吳氏生子三人皆早世以兄之孫符琢為長子介後嘉慶四年十月某日葬先生于梅子嶺先塋之左門人吳定涕泣為之銘曰
文雄千古遇屯一時一時之屈千古之師豈無公相高傑靈飛百千灰滅公尚巍巍韓歐之側配食攸宜謂予不信請視來茲

又劉海峯先生傳 姚鼐

劉海峯先生名大榭字才甫海峯其自號也桐城東鄉濱江地曰陳家洲劉氏數百戶居之為農業多富饒獨海峯生而好學讀古人文章卽知其意而善效之年二十餘入京師當康熙末方侍郎苞名大重於京

師見海峯大奇之語人曰如苞何足言耶吾同里劉大樾乃今世韓歐才也自是天下皆聞劉海峯然自康熙至乾隆數十年應順天府試兩登副榜終不得舉乾隆元年舉博學宏詞乾隆十五年舉經學皆不錄用朝官相知提督學政者率邀之幕中閱文因歷天下佳山水為歌詩自發其意年逾六十乃得黟縣教諭又數年去官歸樅陽不復出卒年八十三無子以兄之孫某為後先生少時與蕭伯父薑鳴先生及葉庶子酉最厚蕭於乾隆四十年自京師歸庶子與蕭伯父皆喪獨先生存屢見之於樅陽先生偉軀巨鼻能以拳入口嗜酒諧謔與人易長無不盡嘗謂蕭吾與汝再世交矣天下言文章者必首方侍郎方侍郎少時嘗作詩以視海甯查侍郎慎行查侍郎曰君詩不能佳徒奪為文力不如專為文方侍郎從之終身未嘗作詩至海峯則文與詩並極其力能包括古人之異體鎔以成其體雄豪與祕磨斥出之豈非其才之絕出今古者哉其文與詩皆有雕板蕭欲稍刪次之合為集未就乃次其傳

宋先生仕秀行狀舊仕 曾祖國漢祖家端父縵康熙壬午武舉勅贈文林郎母李氏勅封太孀人

碑傳一百十二

先生諱仕秀字斐瞻號梅崖先代系出江南當塗縣賣畚明成祖之世有子受者以軍籍成建甯遂家於縣南二十五里之楊林傳三世改民籍至先生十二世矣世為福建建甯縣楊林人也先生生有異稟穎悟過人而記誦之資偏拙日僅可數十言願年十一援筆為制義立就十人慎默不妄言語比當謁選別去先生請益焉則語之曰子但通習諸經可以推倒一世豪傑矣先生驚詫其言自是凡誦讀經傳之文涉日輒記旁及諸子百家書皆能一一得其條理先生自幼讀書於所居溪西之別業曰松谷其世父曲廬先生督家時所築也先生世愛才好士曲廬先生既築別業延師課子弟其中而大書王文成公客座私祝之語懸於堂凡四方士之來遊願假館讀書者察其誠篤輒授餐焉俾子弟得相與講習南豐有湯君廷竹者嘗假館寓讀湯好作古文先生嘗與之論古文湯初靳而弗與言也既而偶疵議時人所作古文先生心契之先生遂以己意求古人之文上下千百年開一以昌黎韓子為師有所作湯見之大驚湯時以己業請正於先生先生為評其得失湯愧服焉先生生而稟賢父兄之教博習於師友而要其所自得于古人者

有天授非人力也先生既博通經傳諸子力攻古人而所作制義益奇人見之多不解者則其非笑之先生自信益篤不為動既冠新建周力堂先生學健歛縣吳翼堂先生華孫先後督閩學先生以諸生應歲科試皆受特知而翼堂先生禮之尤至引與講論輒忘倦焉先生又嘗代族人作書求文於甯化雷副憲副憲得書驚嘆曰是書淳古冲淡古大家手筆也而他求文何耶既而知出自先生亟向人稱之於是先生古今文之名遂日著於鄉里間矣乾隆九年甲子先生年三十以第一人舉福建鄉試明年會試不第歸歸而其文益闕肆戊辰再會試遂成進士引

見改庶吉士先是先生為諸生日曾梓其制義於吳門其叔兄筠園先生仕玠以辛酉拔貢入太學攜之行篋湖北萬御史南泉先生年茂見之歎曰此天下至寶也雖抑遏蔽掩而光氣自露他日必以名元入清華之選而乙丑會試清江楊勤愨公以大宗伯知貢舉見先生卷洒然異之出闕謂所知曰朱某之文古人之文也學者讀書著文以朱某為法可矣及是成進士名益震公卿前輩莫不折輩行願與之交先生循循然守後輩之禮一進調後未嘗數事還往或以簡傲疑先生者先生

曰吾一介書生甫登第敢傲哉顧惟蒙恩選人翰林俾得優游讀書以成其才而齋子徵逐費日力糜餼稟是重負

聖天子所以長育人才之至意也且京華之地出必假輿馬費且不賞吾懼無以砥礪廉隅也久之疑者解而賣士大夫之好讀書者乃日相從先生講論不輟矣居三年散館出為山東夏津縣知縣日以至誠惻怛撫其民為之謠曰夏津清我公能在任七年以河決改福甯府教授以歸先生之為縣也嘗以歸震川之令長興自況又嘗亟稱何武為吏當時無赫赫名而去後常繫人思及其去夏津也夏津民果日思慕之久而不置也既抵教授任念母老而已躬亦多疾遂假歸侍養既終母喪復補福甯教授仍以疾辭而制撫蕭泉以下多知先生者遂禮請主講鼇峯書院先生再三辭弗獲在書院十一年造就人才甚眾鄉會試多有得科第以去者乾隆四十四年疾日甚乃歸教於邑之濰州書院四十五年七月疾彌篤歸楊林乙巳卒於家距其生康熙五十四年三月癸丑得年六十有六子三人文佑文僕文游皆縣學生先卒孫七人先生為人渾厚和易自其居家至於出與世接於人無智愚賢否一

以真意待之未嘗或立異而人之情偽未嘗不皎皎然若黑白分也遇事開節解應之若不經意而條理劃然初任夏津時讞獄具堂吏竄易供辭於卷以進幕賓輒批行先生覆閱之加批嚴飭堂吏幕賓怒以爲慢己也要言辭去先生婉謝焉既怒不解先生笑曰君果去耶趨命庖人治具躬餞之幕賓遂去繼而來者聞其風皆謹飭治文書不敢任己意終先生之任書吏無敢舞弊者先生於書無所不讀而與人言每以未學自歉人或有所稱引偶誤先生輒爲舉其辭正之自經傳諸史百家至于稗官小說皆然其爲文章始學韓子其後更博采秦漢以來諸家之長而獨成其體於韓子之後其教學者爲文卽舉韓子之所以教人者而綜其要以立誠爲本以文從字順各識職爲旨歸以中有自得而能自爲爲究竟有文集三十卷外集八卷學者讀先生文而先生之志行亦大略可見矣仕驥學於先生也久平日所聞見於先生者甚詳今先生往矣追惟緒言中心耿耿謹詳著其生平本末敘之如右更以諗夫天下後世之讀先生之文者

又朱梅崖先生墓誌銘朱翁建甯梅崖先生以乾隆四十年秋七月二十又九日卒於家庭赴

至福州其從子文偉等來乞筠銘九月十又三日福州書院人士嘗從先生問業者奔走羣議曰弟子眾也不克人人自哭諸寢如禮文請爲位於小西湖之完在堂中庶別於野哭也僉曰然乃設幕卽次眾入皆哭失聲其冬十一月朔又羣來奔走學使者院僉言曰梅崖先生主我齋峯書院講席者殆十年厥教在諸生之心儼古大師諸生於其在也敬以愛於其去也思於其歿也極哀請入神主院中歲月日薦如生先生也使者旣允銘矣亦宜允入主筠曰允哉越日又羣奔走徧請於巡撫及布政按察諸當事咸以爲允於是諏日同請入主者福清林青圃先生枝春仁和沈椒園先生廷芳侯官張揚庵先生甄陶與先生而四鳴呼雖閩諸生之風厚哉抑先生之生且死有以入諸生之心不可得也先生姓朱氏諱仕琇字斐瞻梅崖先生者學者所稱也先生德行醇和以摯其生平以古文詞自力歸於自得要其意欲追古之立言者以爲清穆者惟天澹泊者惟水舍之咀之得其妙以爲文者惟入夫其橐鑰從入之途唐韓宋歐陽上薄二漢放乎周秦崑然而與六經之指合其得之意極其狀也康貞涉灞若黨鬼神而推而準之平直圓方察人倫五以平吾氣以寧吾心斬斬自成一家集代以邇者未之聞焉筠

嘗遭于京師邈然懷古其論此事先生懇懇執袖謂筠曰及吾兩人未
死古文詞論當定也後別去幾二十年一見於庚寅再見於今年庚子
先生自訂其文集成獲可以死不死矣先生自年十有五入縣學見知
於程先生元章後受知於周先生學健吳先生華孫舉甲子本省鄉試
第一戊辰成進士改庶吉士辛未散館以知縣歷官山東東人歌之曰
夏津清治恩能蓋以儒術致之吏也尋改福甯府學教授以足疾自辭
去當事重其學延主福州書院院長後主其縣書院皆本其所自得者
用以教學者歸之竟卒其生在康熙五十年春三月十有七日年
六十有六曾祖諱國漢祖諱家瑞父諱韓祖父竝獲贈如先生官配姜
繼配余男子三文佑文僕文海並縣學生先卒女子二一適梅洪恩一
適胡甯仁孫七開元盛元希元春元穎元發元昌元銘曰
成一家言司馬述韓曰文必自己出且成先生筆今先生其卒矣先
生之藏吉矣我心怫矣嘻無以為質矣

碑傳一百一十二

五

兩漢儒者以傳經為業纂述考訂厥功偉矣而質行或少遜焉其傳經
者類多守其師說頴門名家轉相傳授雖大儒如董子終身為公羊學
不少變惟劉子政父子貫通六經往往見諸文辭然子政之學博矣而
不免於褊子駿依附王莽假六藝以文姦言益不足道也東京學者於
經益勤然頴已守殘各是師說踵訛襲謬弊仍相因求其穿穴諸經通
疎辨析以衷一是而質行無虧鄭康成一人而已若金谿楊睦亭先生
其間鄭氏之風而興者與先生幼孤受經於曾大父稍長讀遺書窮日夜不
並以學行聞於鄉里先生幼孤受經於曾大父稍長讀遺書窮日夜不
休手寫九經文詞凡五過於註疏家言旁推交通得諸心措諸行而不
苟為論說曰前人之述備矣吾擇其善者從之可也先生處身修潔內
行醇備家庭之內秩秩然雍雍然初娶李宜人生子曰韶繼娶聶宜人
生子曰護曰鞅母子兄弟不知其有前後之異也三子皆授之以經韶
為縣學生護乾隆甲辰進士刑部湖廣司額外主事鞅乾隆辛卯舉人
選授南城縣儒學訓導初乾隆乙酉比部君之舉於鄉也年甫冠負蒙
氣有異才人皆敬而憚之瑞金羅臺山尤愛之尊聞集中載與楊適公
書謂比部君也及訓導亦以甫冠舉於鄉兄弟同居京師人咸羨之訓
導尤達於經雖年少而粹然有儒者風前輩公卿之深於文者嘗與論
文深契之然比部兄弟故孝友自壬辰下第歸每屆春闈更造以應不

皆離父母左右也甲辰比部旣得官遽假歸欲令訓導得上春官云蓋先生之教於家者如此先生諱芳字仲篋號睦亭雍正乙卯乾隆癸酉兩以五經中鄉試副榜晚選授瀘溪縣學教諭潔身修行爲學者師秩滿遠乞歸享年八十以乾隆五十二年十二月望日卒卒之日正襟危坐有鄰媪入其室視疾麾之去其天性剛毅庶幾曾子易箦之風與諸孤下宅兆旣得某山原俾九泉爲之銘銘曰

於戲先生一世之師匪惟經師實亦人師余嘗哭先生之靈云爾今也銘先生之藏無以易之於戲後之想望先生風采者其尙有考於斯

李保康君岐生墓誌銘

張選覽

乾隆五十有三年春襄城李君文亭謁選於京師得湖北保康縣知縣遠卒於京邸寔二月二十六日也喪歸而父年八十餘三子君其仲也兄以哭弟死而君之夫人方病其子曰號泣躃踊無以活踰二年封公喪又八年夫人喪謀葬孝子乃求武君虛谷億爲誌且銘虛谷謂莫桐岡宜今雖官於黔卽歸耳余歸不及見虛谷而虛谷又沒孝子乃以其狀來請余事詳而詞哀余爲刪而著之誌曰君諱岐生文亭其字其先山東冠縣人元末遷於襄四傳爲明戶部尙書恭靖公諱敏恭靖公之

碑傳一百十二

六

弟之子生員祥修職郎階生贈文林郎繼性是爲君之祖封文林郎象嚴君父也君幼有神童之目年十四入學試輒異等歲庚辰舉於鄉數年權裕州學正又權西平教諭補汝州學訓導歲庚子登進士第七人先是君卷已定第一人皆傳觀拆卷爲忌者所抑殿試卷又爲忌者抑三甲歸班加教授銜以七品封其親返汝州學任伊陽民秦國棟殺其令而闕撫軍勒兵汝州聲言屠伊陽民且潰君急自幕府榜諭止治首惡十餘人乃安勘禁書有將以書語違礙上聞君力言其人已死子孫不識字且其語皆以文害詞不足理也事遂寢歷俸滿當遷觀察張公有年督學王公大鶴同薦之爲其守所持又歷俸滿賑飢於永城乃以堪膺民社薦於是才得一縣不及爲而卒年五十有五嗚呼人之哀文亭者以有才無命有蓄無所發抑塞困頓而歛焉以折而余謂此猶其後也文亭孝友人以踰臺之親不逮養又痛隕其兄此文亭之魂不寐吾知其拊心泣血於冥冥中也今余揮淚而爲君銘因更念虛谷虛谷地下見此銘應讀之而流涕也君配崔氏封孺人婦德克備子希沆廩生希平希濟廩生希濂皆勤苦而爲進士之學女一孫二女孫二婚字具於狀所著經學授受源流四卷憩園詩存四卷某年月日葬於某

阡銘曰

範我馳驅有物焉以尼之誰之不如乃迪如道如如斯已而挺挺兮倏以摧千秋兮一坏既極兮後受祺我之銘以為期

王先生士芳傳

沈大成

先生姓王氏名士芳字南亭浙之臨海人其生在順治十六年己亥距今乾隆三十五年庚寅百有二歲矣吾聞古有兀者也而王先生以其道也數今之齒無有逾先生者也而王先生則以其年也年而在而道即在焉先生家萬山中父曰某祖曰君極世業醫將乳父夢有蒼顏種髮者僕而南來已而先生生故字之曰南亭志瑞也康熙十五年耿精忠反圍中其逆黨曾養性犯台州先生之祖奉惠獻貝子命往諭賊被害先生從其父奔哭乞師夜襲賊營裹創苦戰大兵繼之賊大敗走温州已而貝子薨於軍功不及敘遂歸家貧讀書賣藥以自食為諸生屢試不利久之父卒妻亦旋卒以是益困然一日入其郡之松山路旁遺鏹百餘金先生偶行見之意必有急所墜坐守不去日莫有哭而至者詢之則鬻產以贖父罪金失將死於此先生亟出金還之其人欲分其贏先生笑謝而歸是夕竟不能舉火家人嗟怨先生處之自若其勇於孝

義如此乾隆十九年先生年八十餘始以歲貢選遂昌縣訓導越六年

辛巳循資引見

神傳一百一十二

上以其年老特進階六品在京恭祝

聖母慈壽拜表裏宴饌之賜與宴得贈二代壬午乙酉

聖駕南巡溫旨勞問並令朝見

皇太后拜數珠珍綺之賜

皇上親灑宸翰錫予之丁亥致仕家居次年戊子先生年百歲得

旨建坊優加銀幣今年之秋以祝

萬壽朝京師蒙

恩召見欽授國子監司業在籍食俸特旨嘉獎依古以來學官小臣受恩之渥未有若先生者也先生有子四人孫十一人曾孫五人元孫七人來孫八人舅孫一人一門之內七葉相見有轅固之學術有馮唐之知遇有召公爽之遐壽詩所謂福祿膺之者先生斯其人與先生童髮縮背健步善飲日光奕奕注視人有迎之飲者無不赴能作擘窠大壽字所至人爭求之間其服食導引之說曰吾惟知屏思慮節饑飽順天和而已嗚呼先生之於道何如哉或又言先生嘗見巨魚暴於陸取而

投諸水斯須雲霧晦冥中若蜿蜒而升者又嘗夜行大橋俯視有物厯然伏其下既過數武虎突出吼躍去台人傳以為奇然吾觀先生復讐急難累更貧困危苦而不改其素其大節有過人者彼所稱事近怪異君子所不道故從略焉

贊曰古者至治之世物效其祥即草木之無知亦能蒸出芝菌以為瑞故黃髮兒齒之老優游康衢歌詠太平是豈人之為哉皆上之德化有以致之也蓋朝有萬壽無疆之

聖主斯野有百歲有羨之儒臣以觀王先生之年彼安期偃佺之倫何多讓焉美哉希世之瑞也

李先生觀瀛傳韓夢周

先生名觀瀛字湘友十洲其號也萊之膠州人父澤禹城教諭先生以雍正乙卯舉於鄉晚年教諭萊蕪是時州縣以吏治相尚持苛深迎合上官意旨待士無體驅使教官如屬吏縣有富豪與楊姓比居而利有其宅與鹽賈通謀誣以私販沒入之楊姓弱不能理其族人生員某訟於上官上官庇富賈不勝檄學戒飭富賈欲廷辱之以洩忿逮繫某生促召學官至縣廷決獄縣使三反先生不往具稟本府言待主自有體

碑傳一百一十二

今事屈已甚或致決裂壞士風傷國體遂力求去以歸先生為人質直義所不可不以利害阻與人言侃諤白遂而出之以誠意人不以為忤也海陽鞠翰林謙牧善清談與先生會於京邸推闡陽明氏說灑灑不可竭先生抗聲與辨謙牧心折改容謝先生初為學同里張進士山民方以理學古文倡率後進獨心器重先生招與遊處與折衷經史及儒先書學以大就其教人必宗朱子家言曰孔孟正傳在是烏可舍康莊由曲徑也年七十有九卒子三人壽鼎壽國俱學生壽民先生之歸也膠人果以城築之役當事者辱士士大闕當事者解綬去人以是服先生先識云

論曰余嘗至膠過法迂齋海上盧閱迂齋集評點多出先生手歎其學有本源王君幼藻先生門人也通經學善古文詞為余言先生行事甚悉因示以狀略及迂齋所記軼事而屬為傳余錄著之如此先生平生不喜著作嘗曰古今事變義理精微先儒論之詳矣深求自得之可耳即此殆與炫詞華以邀名者異矣

父萊蕪縣教諭十洲李君佚事法坤宏

李君十洲罷萊蕪而歸過余海上盧歡飲十日為余具道其生平及去

官本末曰吾惟子之知異日當為吾記之初奉天宋公文錦來知州事
延君主珠山書院宋陞泰安府知府而君得萊蕪為屬縣教諭當是時
州縣以吏治相尚待士無體諸生有訟事輒延見脫冠崩角稽首甚至
鎮瑱博頰栝極之如慮囚法驅使教官如屬吏縣有富人與楊姓比居
而利有其它與鹽賈通謀誣以私鹽沒入之楊族人生員某訟於上司
不勝發亭戎飭富人欲廷辱之以洩忿逮繫某生促召學官至縣延決
獄訓導宋預託疾縣使三反君不往具稟本府求退且陳其弊言事屈
已甚或致決裂壞土風傷國體所關非小未幾果有膠人城築之變學
使者按萊郡七邑士大闕當事官解綬去人以是服君之先見君為人
樸質執意孤行不求諂於人人亦信其無他乾隆戊午三韓法公撫東
國君與州人法孝廉重輝俱膺聘入幕府君主教讀孝廉主幕事撫軍
好學每過君詢問經史而吾膠協鎮張原屬河東總制田堂官寄耳目
時田已去任張仍踵故事侵奪有司權君嘗論唐藩鎮禍推言及之值
其年軍政撫軍列款入奏罷張官孝廉持牘諫撫軍曰李先生涓古君
子言不妄吾終不易矣同年友汶上軒轅君誥以明通赴教職例送撫
院考到君閱其文考下明年軒轅會試第一人晤君京邸靳曰何無

碑傳一百一十二

九

香火情君笑謝而已君歿後其門人王克拔攜君佚事將作誌狀行世
乃為述余所知于君者付之以卒君志同學姻弟法坤宏拜手書

潘氏四學博合傳 潘把奎

潘惟相

潘氏先世為齊人前明遷河西諱惟誠者官鎮番游擊死土寇之難執
干戈衛社稷邑人哀之立祠祀焉後裔卜居武威遂為武威人弟惟相

國朝由貢生官直隸廣平知縣是為廣平公公初司鐸邵陽課士有方

擢宰廣平以德化民愛之時直隸各郡縣數被流寇蹂躪丁戶逃亡

田之沃者輒為豪猾所占而賦役則里甲包賠公廉其實乃與民約出

田契驗所有履畝量之遂收前明契給新契契外不得侵尺寸田田或

無主則仿古計口授田之法民已逃散而歸酌其食指授之田而又浮

授田若干畝聽民出售易牛種不期年民皆復業鄭先生長年謂挹奎

曰廣平民至今猶稱其田為潘公田云長年武威人嘉慶間官廣平縣

知縣

潘林

廣平公於挹奎爲遠族今明經潤苞其裔也吾之族與吾高祖齒而官
學博者則秦州公公諱林字蔚之乾隆初貢生任秦州爲訓導易直子
諒官秦州凡二十年歷攝秦安清水禮徽各縣儒學篆士愛之如父兄
而公亦諄諄教不倦也始公從張觀察瑄美學張旣仕於粵東寄書有
云學問無自滿而可以加進者若參之以浮躁之氣加以以懈怠之志
斯猶決流者愈趨愈下無足重矣又書云吾儒須敦尚實學勿事虛名
更要於六經諸史沃其根柢淹貫通曉與夫唐宋大家文講明而切究
之下筆方有實據又書云詩言冬之夜夏之日蓋就其長至者言之也
然孰有長於吾黨之交情者乎數年來海濱索處簿書之暇亦嘗較士
而有成恆少以名讀書不如從實讀書以口耳讀書不如從心地讀書
此種工夫全在靜中理會不可以人事參也公佩是言終其身故於學
粹然有所得挹奎敬述之以見先正師友以學問相切劇如此

潘黯德

秦州公先由鎮番遷武威爲武威人而吾自九代祖諱一鳳以降凡七
傳皆籍鎮番爲文學六代祖贈教諭公諱雲起因諸父諱治世者攝涼
州總兵篆偕至武威家焉然已爲武威人而應試仍籍鎮番其在武威

應試蓋自吾父始也以故吾叔曾祖甯夏公爲鎮番貢生吾伯祖卽墨
公爲鎮番舉人甯夏公諱醇德字懋修官甯夏縣教諭毅然以師道自
任不妄有所取於生徒尤不能迎合上意以勢見誣本郡經歷某因監
修渠工誤扑諸生諸生大譁公以士不可辱爭且不已同城自觀察
以下爲之緩頰經歷某詣明倫堂謝過且爲諸生謝爭乃息而其人士
以公干城學校伐石紀其事及公歿生徒相向而哭若喪所親公爲人
方嚴文章有法則不苟作旣不利制科構精舍於宅之南偏左右圖史
朝夕諷詠尤慎擇交生平稱莫逆者惟詩人秦安胡鉞同里劉統

潘中吉

卽墨公諱中吉字藹如號戊齋乾隆甲子舉人年甫三十除沔縣教諭
遷慶陽教授奉先曾祖司馬公諱去官服闋選鞏昌教授公爲學博歷
郡邑凡三士論翕然稱賢而於沔縣課訓尤勤沔入至今德之官鞏昌
時由舉人行取知縣籤舉卽墨知縣時天下久治山東尤稱殷富民或
習於逸豫朝夕朋飲甚至聚賭以相歡樂公旣蒞任謂民習不可不變
且酌酒賭博訟爭之端而命盜案之藪也爲銅牌二鐫文其上曰酌酒
者拏獲酌酒者釋放賭博者拏獲賭博者釋放民如有犯則懸銅牌胸

前飭其訪有再犯者則更替之以此互相創懲積習爲之頓改乾隆庚子春

高宗南巡蹕經山東公承辦鄆子花園行宮於常所供張外未嘗增華以耗民財上官復派協濟眾興集驛馬半棚公謂是將重勞吾民也捐俸供之無何而縣有冤獄已解勘咨刑部矣公訪之得實將平反或以被吏議沮公公曰惜一七品官與殺一無辜孰重卒請更正公爲人豪爽詩古文兼習之其於四書制義思論英偉在黃蘊生陳臥子之間牛木齋先生運震激賞焉終身以不成進士爲憾著有堅屋集歿後散軼今所存者棧道雜詩一卷戊齋制義一卷藏於家始公需次都門滿洲瑛寶見公奇之以爲貌似韓子瑛寶嗜古精鑒賞嘗見昌黎畫像故云宰卽墨時邑人郭尙書琇之孫名昶者守甘肅西甯坐屬官冒賑將籍其家公以尙書居官廉明後人不宜罹慘禍多方調護之其家賴以不毀後郭昶降知縣宰張掖公之喪歸卽墨哭來會葬涕出不已哭蓋感公之德而人亦以是稱公長者公歿於乾隆壬寅越三十九年吾父官城固教諭於是吾家由廣平公至吾父凡官學博者五代

張學博大烈傳

潘批奎

碑傳一百十二

七

學博張姓名大烈字子節武威貢生司鐸陝西邠州爲人方嚴自秀才迄入官未嘗妄有所取教授生徒法甚峻而不畏苛細人以此畏之久且愛之官邠州時諸生執贄來者量其有無受之如貧士也則曰老夫亦貧士此芟芟者出自富人誠不足重輕貧士將費掘羅無裨於我而於貧士有損無爲也贄往往卻弗受大府聞其賢且以年八十以上招之應秋試遂援例

賜舉人時大府爲畢尙書沅異學博之老而壯也一日延學博于署後圃呼公子出與會文試文孰先成公子年二十以往雅自負旣出與學博交揖對案坐俟尙書發題頃之題出學博吮墨濡毫文先成尙書覽終卷大喜謂左右文旣清新書法尤端謹且先成此真老師矣厚禮之乾隆五十四年己酉秋試後事也居無何尙書語學博吾固知若貧士吾將以五百金助若若應禮部試以年例可得翰林檢討學博對曰九十老翁勉強上公車求不可必得之檢討且藉會試名而得五百金肥其囊橐汲汲於名復汲汲於利負明公道造士之心失學者恬退之義大烈不敢也且大烈將去此而歸爾尙書尤喜遂許之歸學博旣歸齒德爲一鄉之冠嘉慶丙辰舉行鄉飲酒禮推學博爲大賓進退揖讓德容

睥然鄉人望而敬之始學博為明經家居其從子婦病為鬼物所憑或啼於室或語於獨或嬉於廁嗚咽嘔不堪其甥一夕學博肅衣冠坐堂上子孫行列左右階然巨燭堆冥鏗門外則縛病婦出而數之學博頷而暫護嗜美鬚髯面冷如鏡陳說幽明理甚辨病婦跪而稽顙不已額至出血左右髮皆豎學博忽大呼曰去矣病婦遂仆於地命掖以入解其縛而焚冥鏗滅燭各就寢越宿而婦病若失鄉人至今述審鬼一事赫然張學博在也

潘挹奎曰凡為厲以禍民非鬼也鬼與神皆德之盛祇伸與宿之殊焉是故韓子以禍民者為物物乘人之氣餘而得所據則耳目口體盡為之用矣人苟正其氣以奪物之所據物無耳目口體以禦乎人勢將至於漸滅而後已張學博非審鬼也當未與物接之先其氣已攝乎物特藉聲容以解人之惑云爾吾鄉又傳賈明經培成能為人驅鬼賈亦篤行士也

彰德府林縣訓導余公瑄誌銘 崇士錄

簡命守禹聞郡明經潤亭余公品端學粹淵源有自以于役勞竿未遑

造廬泊以公會得親言貌心益重之後公鐸林數載卒于官嗣子星源

奉柩旋里卜葬城東先塋之次而因學師楊郭以狀請銘子維余氏為

郡望族忠孝節義代有其人而公以實踐之學發為實用誠有為學術

世道所攸關者謹按狀次之公諱瑄字韞石號潤亭林邑門人私諡曰

清恪先生系出吳越錢氏始祖諱賢自江右高安遷許有義行載許志

四傳至公祖諱冲海遷禹躬農桑好詩書生公父長庵公諱丙捷廩膳

生贈修職佐郎清苦力學前州守蘇稱為吾道干城詳登府志儒行著

學宮輯哈館課餘談督學蔡葛山先生深嘉賞之徐杏池先生稱為有

功後學頌存通省學署母杜孺人勤和讓相夫教子學人贈賢孝壽

言百數十篇兄珩庠生著聞得錄弟昌楣庠生著綱目統論公幼沈靜

不樂嬉戲入塾益端謹雖盛暑亦未嘗露體年十七冠童子試為前州

守邵所器重二十請行冠禮長庵公喜與行之入庠後學師屢舉優已

卯辛卯鄉試薦不售公素承庭訓留心儒術作防心要言自箴居恆昆

弟交相師友體論先聖賢儒道理朔望必謁先師講小學率弟子習禮

秉林鐸為諸生宣講 聖諭及歷代鄉約即教即學務示以聖賢階梯至若考祀典表名節徵

求古跡皇皇如弗及六旬後每元旦舉一歲言行焚香告天有者年日記稀年約意二則蓋公之積學砥行肫誠不欺如此自程朱表彰絕學前千餘年聖賢相傳之道燦然大明雖有異說不能亂也有明講學者出借釋氏之用爲用眩滄鼓簧以僞雜眞至今猶有惑其說者公每觀其書輒心憂之於是作學鑑二十六卷枕心集十卷羽翼正學爲後世法其書分門辨類徵引宏博所以示學者向往之途至詳且悉其他著述有林署考典釋訓鄉約慕言讀志隨筆筆詩備覽枕心齋古文詩鈔皆有闕世教學者彙而讀之足以知公之用力於此事者勤而志之所期者遠矣郡學博香亭程君稱爲程朱正脈孝廉一齋趙君贈以道脈嫡嗣論者以爲不誣也公生于雍正甲辰七月二十五日亥時予嘉慶己未十一月初七日酉時終命壽七十六歲葬以庚申仲秋望日戊辰學者與長庵公並爲立祀配劉孺人監生諱璋女克職婦道男一星源庠生娶賈氏監生可立女女二一適任超一適監生王殿遴孫男一家芳業儒娶陳氏孫女二曾孫男三本直本正本中女三銘曰道術日弊交相上下昔在異端今在儒者惟公講學恪遵程朱擴清異言羣慝消沮公之勤學出于至性著作等身一軌於正無志者葵有志

者岐公言不朽百世之師

碑傳一百一十二

三

故三原縣司訓康公紹衣墓誌銘

康甫

緩齋康公諱紹衣字問言世居郃陽城內北街前明萬厯己未進士歷任戶部雲南司事諱姬鼎其曾祖也祖諱體謙康熙庚戌進士有來青閣制藝行世父諱啟疆監生例銓州同知不果就公生于康熙五十九年十二月初九日乾隆五十九年以歲貢生授三原縣訓導六年俸滿予告旋里越一年卒則嘉慶六年二月初七日也壽八十有四公之少也產業無幾雖因仍舊家門戶而先世留貽久已蕩廢不存兼又早失所怙與母甯氏榮榮相依有弟二人無甚生計可營度日蓋不勝拮据沈潛好讀書寒暑罔懈無師資刻苦自勵有從叔某課子于家頗有學公每伺其講論去而竊聽隱之弗敢使知遇先達輒虛心求教必窮極其說而後已中年遊長安武功孫酉峯檢討主關中書院講席諱諱稱許謂其學業深窳直邁時賢而上撫憲陳榕門先生亦嘗踰格嘉獎之於是譽聲鵲起無遠近入若士皆知有康某者但舉其行第不待稱名也顧遇合不偶小試屢列高等拔前茅而困于棘圍累薦弗售蓋公之讀書義理必期信心凡所講深微測隱不屑屑人云亦云爲文章以天

崇大家爲宗嶢刻峻峭駢踏時蹊故往往抱知希之感而要亦終不改
易其紱轍正如陳臨川所謂專車沈香雖不見售斷不敢析而爲薪以
非其價者也其司訓三原也甫蒞任謁文廟見兩廡賢儒主有奉功令
當去而仍留當入而未補或舊有業已損失現在仍復錯亂者心頗不
愜卽搜得闕里文獻通考及雍正年間從祀賢儒姓名印冊一一釐定
補缺遺者四十三黜濫存者十出無考者五證姓名錯訛者六規模頓
覺整飭學憲知之嘉許再三卽諭通省儒學皆依此留心以更正之有
某生者因公事與差役忤至于搆難差役唆諸本官拘生將懲治公
毅然不以爲可力與之爭事乃解士林無弗欣悅其他教誨殷勤俸遊
其宇者如坐春風則尤不可悉述云生平抗直自任是非所係不少假
借不知者咸疑其不可近其實與之言學問論事理則津津壹壹無甚
崖岸不平之處此余自少相與晉接迄今數十年一一得之親見者非
有誣也配魏氏生于雍正二年五月二十六日得年五十二歲于乾隆
四十五年五月十九日卒今存者繼配楊氏也子重光公仲弟諱照乘
子爲公嗣方今遵例入國學事甫就而公卒矣痛哉銘曰
學充而富官薄而清何窮何達隨遇能貞以延世澤以續家聲在爾子

碑傳一百十二

古

碑

孫承繼尚當藉其餘榮
敕授修職郎定番州學正晉贈儒林郎翰林院庶吉士張公德吳墓表

文粹

吾師健齋先生既歿之十有五年哲嗣曉瞻成進士入詞館越歲己卯
恭遇覃恩贈先生如其官將假歸省母肅然告子曰少失怙先人窳窳
未有誌銘今仰承遺澤得少成立使潛光弗曜心滋懼焉乞爲文以表
之嗚呼予事先生久知先生最深義不可辭謹按狀先生諱德翼字健
齋先世居鳳陽二世祖屋從明太祖開基贈昭勇將軍三世祖德封護
國侯四世祖眞授榮祿大夫終明之世襲蘇州衛指揮使居蘇州高祖
介社贈通議大夫曾祖起鵬祖沆俱爲縣令有循聲父諱世楷國子生
贈修職郎今贈太史謹厚多隱德隨兒世昌宰清鎮遂居焉子三人先
生其季也先生幼而孝友家貧爲館粥先以奉父母及諸兄妹而已常
弗飽伯兄有疾思甘泉先生甫九齡夜出郊數里汲以飲既長勵志讀
書補弟子員食廩餼俱冠其曹肄業書院請所貯書精研博覽學益進
每試輒高等當是時鉅公激賞同輩斂手畏讓無不以重遠相期許然
終不遇以優行貢成均官司鐸先生泊如也反躬敦行無所怨尤日手

一編怡然自得其詩文益沖微遠論者以為可及於古生平至性過人門內無忝處世寬厚平易不言人過失內自介然不可干以私自奉簡約而疎於財嘗以數百金貸門人之空乏者已而焚其券至今鄉里猶追慕之其教人先品行而後文藝聆所講論使人踴躍鼓舞前後家居授徒主講勻陽黎陽粵西秀峯潯江諸書院官都勻開泰訓導遷定番學正所至訓迪不倦凡生徒之穎異者期以大受中材以下亦各有成嘗謂世無棄材在囚人以教之故所造就甚多憶某侍先大夫任於黔獲從先生游時某方少先生絕愛某殫心誘掖析疑辨難六年餘相依弗忍舍也及某奉先大夫北旋出所得於先生之緒餘應試無弗獲倚由詞垣歷卿貳掌封圻競競奉先生之教惟謹而繫官於朝末由相見某使黔而先生在粵某撫黔而先生歿已久今昔聚散之間可哀也已然某聞先生年六十始舉子歿時子幼家無恆產師母支太安人紡績撫孤不數年而曉瞻以領解冠於鄉旋以御試冠天下蜚聲詞館仲子亦彬彬序開方興未艾此所謂為善無不報者哉某甚慰焉夫中和純粹之氣蘊蓄久而發越必奇先生篤實勵行抑然善下不顯於身即顯於子曉瞻昆季格守先型局量宏遠行見勳名事業彪炳寰區積

厚流光家道寢熾

文言餘慶信而非誣後之人過墓左而讀豐碑亦可

以觀感而興起矣先生生於雍正癸丑三月十一日未時卒於嘉慶壬

戌十月十一日申時享年七十前娶王安人繼娶支安人子二長日晷

庚午舉人丁丑進士現任翰林院編修兼武英殿協修次日融庠生女

三長適國子生康師灝次適國子生文可鎮幼適廩生黃永禧先生卒

於官歸葬於清鎮之九采原茲為表其墓如右
新會縣教諭前署福建甯洋縣知縣吳君槐炳墓誌銘 陳昌齊 撰 陳昌齊 書
乾隆三十有五年歲在上章攝提格

朝廷大開恩榜鶴山吳君植亭以粵省第十六人出主司上海陸耳山

先生孝感簡玉亭先生門下於時同舉者惟君與饒曼塘馮魚山溫質

坡名最盛而余監廁其閒稱齊年辛卯余選庶常厥後曼塘以乙未魚

山以戊戌箕坡以甲辰先後成進士列詞垣君正如旃檀異香逆風彌

烈每當公車北上相見於郎往往作竟日談劉切古今若無難一一見

之行事也者歲辛丑以一等發閩省補縣尹言錢於郊僉謂君此去大

抒生平所抱負循聲上播成就未可涯量君曰求冷官以資祿養吾意

也於不然稀膏棘軸不能運方穿將奈何慨然而去既至閩大吏器之

令代清理省屬積案事竣權知甯洋縣事凡三載內無塵牘外有口碑
以事偶掣別請就司鐸大吏留之不得蓋君本志原不在百里雷封也
次年君補英德縣博士曼塘則以是年鐫職尋補中書魚山亦以是年
改比部主事未幾相繼卒余蹶而復起久之乃由給事備兵甌海被議
歸迴憶京華聚首今在都中者僅篋坡侍郎一人擁皋比主鱣席逍遙
乎詩書之圃則君而已嘉慶己卯余奉纂通志抵省意錄科時君必以
職事來庶幾復圖良覲而君之哲嗣應遠亦以與修輯事至出君行狀
相示始知君歸道山葬且有日矣余舊學於太史氏誌墓其職志也因
節狀語舉其大者書之而系之以銘按狀君諱槐炳字松茂祖諱紹裘字
著籍廣東肇慶府鶴山縣曾祖諱雲龍字奕隆別字松茂祖諱紹裘字
嗣芳別字棧園皆埋照跋光弗耀於世考諱奇俊字宗藩別字秋巖以
君貴地封修職郎妣黃氏地封太孀人松茂之隱於市也減衣縮食命
僕園公率秋巖公從師受舉子業時以環頰稱之松茂公壽日高秋巖
公因以身任肆中事督君讀書夜以三鼓為節五鼓即起寒暑風雨無
少輟君亦發憤自勵年二十受知於學使鄭炳也先生補郡弟子員又
二年補廩膳生學使則大興翁覃溪先生也時沈椒園范蘅洲兩先生

碑傳一百一十二

先後主講粵秀端溪兩書院君從之遊均有國士之目庚寅舉於鄉辛
丑大挑一等以知縣發福建試用及至上官委辦閩侯二縣積案一經
判斷無有上控者又奉檄監秋獄人犯數百君以各犯遠來則飢飽不
時在獄則燥溼不一所以體恤之者備至旋署龍巖州甯洋縣事既蒞
任諭民各安本業倡修雙洋書院增膏火延名師以造士縣多門殺案
君蒞事三載獄中無囚犯相驗祇投河道斃兩次論者謂不事擊斷而
民如草偃有古良吏風先是縣城東西兩水夾流各有長橋久將圯君
重修之更名曰太平曰青雲工甫竣而秋巖公奉樸園公就養至君迎
於郊外樸園公率秋巖公為前導君偕諸子及孫曾輩隨其後是日也
邑人扶老攜幼喧呼塞路僉曰自我等知人事以來未聞有父母官四
代同堂又同就養官署者橋成而福入至匪直資利涉抑亦吾邑昌大
之徵也邑有開鐵山者其爐頭悍甚惡少倚為逋逃藪往往出貽民害
君悉其積弊詳請封禁屢請屢駁於是請就教職歸計行箴中惟寸文
瑜黃瘦瓢畫數軸謝古梅黃莘田詩文集十數卷壽山石數十枚而已
乙巳六月選英德縣訓導君奉樸園公至署遍覽碧落洞金龍巖諸勝
盤桓數月秋巖公則歲往返以為常英德自康熙開陽城田文端公來

宰是邑建書院立三賢祠唐忠肅公介洪忠宣公皓鄭監門俠每歲奉秋祀諸生咸來習禮又以禊日會帽子山重九日會南山聖壽寺作文賦詩人多向學公既去邑人立木主附之曰四賢祠改舊書院曰文端書院其後浸不振君復修舊觀月課之外令諸生進所業口講指畫尤諄諄以砥礪廉隅為訓一時稱為達師丁巳十月秋巖公捐館舍君以憂去極哀盡禮三年中未嘗見齒辛酉三月選補新會縣教諭當是時黃太孺人春秋高君恆慮得缺稍遠則迎養未便及捧檄喜甚君妹適本邑坡山方氏歸兩歲而寡黃太孺人素鍾愛之因迎歸同奉太孺人至署癸亥學使者姚秋農先生飭學查先儒後裔於是新會陳氏認白沙先生嫡嗣者日繼至君閒至白沙村見眾田父耕於隴因與言白沙公故事語及公嫡派則皆嘆息曰微矣祇阿禮曾人貧甚歲以蒙館活耳君曰阿禮未聞學使者訪求先儒嫡裔乎胡不自陳於學官秀才可得也皆曰固聞之然有某某者以千金啖學官學官既許之無能為已君笑而去詰旦陰使人召陳禮至年三十許誠篤士也試以文頗有條理命以譜牒呈果不謬復之學使而陳禮得遊於庠此事君始終不言其故而傳頌者遍邑中意隴上人作無當危云庚午四月丁黃太孺人

碑傳一百十二

七

憂以七十之年哀泣作孺子慕從此殆無歡趣矣癸酉冬委署花縣教諭強之任甲戌春得代丁丑三月二十九日無疾而逝君天性瀟灑五十歲後見秋巖公黃太孺人色稍不豫輒長跪請罪不令起不敢起生平妄語不以才知先人不度人以不肖不為曖昧不可告人之事急朋友之急如其身初任英德學時同事嘉應劉公健堂陽亨卒母八十餘矣遺孤四人甚憚為經紀其喪事俾稍有贏餘而去甲寅秋仁化學陽春譚公某錄科在省卒於客寓即令戶部主事康侯譚君敬昭父也時試事方殷朝報故而攝篆者夕且至書役各散去朋友亦罕有過存者譚君覺然囊無一錢君朝夕慰問奔走設策得扶柩回里君博極羣書尤加意於先儒語錄旁及釋典道藏著晚香堂詩集二卷花峯樵唱一卷晚香堂家訓二卷格言彙錄二卷留香齋詩談一卷張曲江集訂訛一卷夢說十卷俱藏於家君生於乾隆壬戌年十月十三日卒於嘉慶丁丑年三月二十九日享壽七十六歲由廩生中式庚寅恩科舉人辛丑大挑一等分發福建署龍巖州甯洋縣知縣改補本省韶州府英德縣訓導歷署始興訓導順德花縣教諭廣州府新會縣教諭敕封修職郎例晉贈文林郎配譚孺人敕封八品孺人例晉封正七

品孺人邑處士某某公女子七人應韶庠生應達乾隆乙卯

恩科舉人應圖嘉慶辛酉科舉人景山官學教習俱譚孺人出應麟康

膳生庶室李孺人出李孺人先君卒應傳應龍應驥女一人適南海從

九品馮翰璋公子伯生炳麟俱峇孺人出孫男六人逢登逢年俱應韶

出逢慶逢壽俱應遠出逢牲應圖出逢春應麟出銘曰

英英植亭清芬載續麟角爭巉鴻毛奮迅素所樹立匪百里才胡弗少

待乃賦歸來豈云大瓠難容濩落其進可圖其退轉迫知而能恬淡以

濟泊數椽校舍滿座春風七賢同室重關異宮其樂在斯奚達奚窮恆

言蓄火宿則彌壯斯人不出厥理可況北山之梓蔥蔚成林有枚有肄

四布森森君作古人我見來者閭閻莘莘詎居人下銘以徵之是曰心

寫

教授文林郎安溪縣學教諭謝君金鑾墓志銘 陳壽祺

君謝氏諱金鑾字巨延一字退谷福州侯官人也考正乾隆二十四年

舉人大挑一等試用武進縣丞改教諭卒君年十三而孤貧不能自給

然未冠則喜讀宋儒書悅心性之說大興朱文正公督閩學補縣諸生

踰壯舉五十三年鄉試嘉慶六年大挑二等用教職君交同里孝廉方

正官崇布衣陳天文貢生陳庚煥皆有道君子相切劘壹志於忠信篤

學其言學以四書為綱五經為輔而力除空虛自守偏執冥行與夫泛

枝濫葉揚批箴糠之弊署邵武教諭有謝生者極貧而孝所親有婦不

安其室逼其幼媳為不善媳不從生議拔其媳歸良家婦遂誣控生學

使至入讒者置生劣等眾盡講請五庠之師自其冤於學使五庠之師

噤不敢發君獨稟學使數千言卒直其獄補南靖學歷司嘉義南平再

蒞安溪安溪堯陽鄉以賽神起衅釀門殺士被羅織者眾匿莫敢出守

持之急君請寬其株連諭使自投而後遣之為耳目將掩執所名捕數

人會令中法事洩數人者遂不可得守歸咎於士將盡視其衣巾君力

爭不獲迺具上其事於學使且曰漳泉無獄不及士設按牒而罪之不

出二年庠序且一空學使蒙古恩侍郎壯其言力主之事乃已初海盜

蔡牽擾臺灣陷鳳山嘉義令急延君問計君曰此間士民更林爽文之

亂其守禦咸有成法召而謀之咄嗟可集也如其言眾果至乃偕令周

視四門指麾分守之夜三鼓而辦賊平一縣安堵然君未嘗自言其勞

總兵滿州武隆阿詣縣聞君賢車騎徑造入門讀壁間教士條約曰通

儒也一見如平生歡假館學解每飯必與偕同知薛志亮聘修臺灣縣

志君講求利病尤致意於政俗薛君歎曰有造海徽之書也巡道楊廷
理建議關臺灣山後蛤仔難君考其始末條其利害爲紀略同里梁詹
事採以具疏請收其民土設官定制

朝議從之及楊君奉

命董其事凡所建置經畫一一必手書報君今新設噶嗎蘭廳是也君
痛泉漳狃於鬥殺劫掠之獄治之者恆禍及學官弟子乃作泉漳治法
諭示所以緝兇訓俗而歸其指於重士以爲教始誠司牧閩南者之藥
石晚漸不樂居官作教諭語留贈安溪諸生其言皆懇惻適於用遺疾
請告諸生籲留久之君竟去乃相與厚贖之歸歸數載卒二十五年四
月六日也嘉義諸生聞之自海外相與鳩賞伏葬祭君食貧樂道一介
不苟取於朋友死生不易行所至獎孤寒表遺伏善護氣類其誨人依
於孝弟禮義負笈者踵接及養病於家猶餽問不絕守令之賢者咸倚
重君君盡言無私異趣者雖心憚君然亦諒其無他腸相尊禮無間非
忠慤廉直爭於人何以及此於乎今之師儒之官能以道得民者勉矣
士之自廢廉隅者日趨污下而未有止求如君者長善而揀其失安可
復得乎哉君所交若陳布衣官孝廉余曩咸相與捧手願恨少不能相

碑傳一百十二

九

從講習與入適道之途晚及陳貢生與君遊又不能朝夕刻勵急引爲
修身之助比諸君子皆已凋謝而余亦衰茶不足以自奮每感風俗人
心之憂未嘗不怒焉慨吾道之孤而莫之繫也於乎可勝悼哉君春秋
六十有四配林孺人前卒繼配林孺人生女二筮鄭氏生子四曰本曰
善曰來兩曰復生以道光二年立冬後四日庚子時加辛巳葬君於西
郭外梅亭天才山之陽銘曰

位卑而道高故其節不撓學苦而心怡故其教不勞如爾在燥如坯在
陶其勸僚吏如其所以勸俊髦其衛庠序如其所以守城壕喪我人師
生徒號咷鄙薄懦頑孰滌磨臊嗟斯人之不作吾又焉知蘭茝之爲蕭
蒿

王先生國瑞墓表

馮名

墓表

墓表

墓表

墓表

世之享豐亨豫大之樂者比比也而窮約困苦之境惟則古昔稱先王
者多當之是故人有恆言稱士者曰寒不曰富士固不免於寒歟抑非
寒不足爲士歟吾謂天下之至富者莫士苦也天下惟士能安貧能安
貧則無所慕於外自無所歉於中而學益充德益飽嘉言懿行供士林
取資而不禁其饜飮人心膾炙人口者雖沒世不竭也若麟徵先生殆

其人歟先生資穎異早年遊膠庠食廩餼好讀書不事家計疏食敝袍安之若素性孝友家庭之間藹如也坐必端步必矩所言無虛妄惡甚嚴然亦未嘗露圭角其設帳授徒也苟可造者曲成之修脯有無不計也故遊其門者所成就甚眾後以歲薦出秉濟源鐸待士一體重義輕財諸生貧乏者每捐俸周之一如從前設帳時去之日垂橐而歸家園蕭條較未仕之先貧益甚然先生口不言貧惟此線裝物弗須與離也暇則杖履優游與鄉黨談孝弟忠信事凡親故門生就見者必諄諄以古處相敦勉其養生也甚闢導引服食之謬惟慎起居節飲食以全其天年壽幾耄期乃悠悠辭人閒世遠近聞之莫不咨嗟歎嘆老成之云亡也先生門下諸君子爲勒珉之計徵文於余余幸近先生之居嘗於晉接瞻仰之餘熟悉其梗概竊體先生去浮存實之意不敢鋪張縛詞謹據實而敘其略夫先生之貧也甚矣世之惜先生之貧者多矣然先生讀孔孟書私淑其爲人孔孟當日何嘗一日不貧也亦何嘗一日不富也先生卽不能如孔孟之飽乎仁義富乎百官而道德飲於時教澤渥於後較之美衣冠豐飲食逞狗馬之樂恣聲色之娛而胸懷空控名聲寂寂孰貧孰富必有能辨之者大貧者先生所安也富者先生

碑傳十百十一

字

所羞言也如余所謂富者以之富先生先生有知得不爲之頤解乎哉先生王姓國瑞名字麟徵一字輯五

臺灣縣學教諭推陞泉州府學教授鄭君兼才墓誌銘陳壽藏

君鄭氏諱兼才字文化一字六亭永春德化縣南鄉人也年十五補縣

學諸生踰壯師事閩縣考功孟先生於釐峯書院學使陸耳山院副拔

君貢太學今山陽汪瑟菴尙書爲國子祭酒器之考充正藍旗官學教

習游京師九載嘉慶三年銓授閩清教諭歸舉鄉試第一主司則今會

稽莫實齋萬載辛筠谷兩侍郎也輩下聞之嘖嘖誦得人君學有本原

敦厚而廉直自以職在教學毅然以潔修庠序闡揚幽隱扶植人倫整

齊風俗爲己任歷安溪建甯再至臺灣凡文廟殿閣明倫堂東西齋廡

及名宦鄉賢忠義孝悌節孝祠莫不勸施興作雖勞勩不憚請獎其好

義尤力者或專銜詳報祀典所不備則審稽先烈潛德請補之其勇於

爲義若飢渴之於飲食然臺灣自逆賊朱一貴叛後不軌相繼跳梁死

事文武弁兵無慮千人有奇久而秦隴潰且漏君諄於巡道遵

前詔建昭忠祠謹據議卹案冊及東瀛紀事十一區而釐之神牌名氏皆君手書以爲義在捐軀而罵賊者雖臧獲可旌情由召斃而偷生者

雖衣冠必絀其激揚清濁凜然於名義之不可假公論之不可追至明以厲也君雖爲師儒官常急鄉國利病有可言於當事則大聲疾呼據之如恐不及蹶然忘其位之卑而身之爲眾忌也其上巡道慶公書力陳臺城浚濠不可上總督汪公論吏治民風械門辨誣三書瑟琴尙書許其志在天下非徒護桑梓而已可謂深知君矣君之始至臺灣海盜犯鹿耳門鎮將以下備禦要隘檄君守郡大西門晝夜巡稽出入奸無所容賊平以軍功擢除江西長甯令辭不就當事重之在安溪與侯官謝退谷同寮交最篤謝退谷者宿學重氣節喜經濟余嘗與君目爲兩賢校官者也既君舉退谷修臺灣縣志而君左右之志成稱善本後臺郡紳士議修郡志請太守必得謝退谷鄭六亭二人而後可太守爲請於方伯調君來而謝君已風疾告歸君赴公車踰二年乃復至事遂不果然君卒刊補謝公之書而海外文獻始備君之去安溪建甯士皆奉君祠位初去臺灣眾爭送之北郊香案旗鼓填塞街市數里不絕君口不言貧居官刻苦歲不能致數金以遺其子其子憚父嚴不敢郵一紙告乏然族親有急當賙卹未嘗不人人給所欲也善制藝嘗十一赴會試屢躋無愠色嘉慶末舉卓異道光元年方伯今巡撫金匱孫公聞君

名檇州縣舉君孝廉方正薦之大府方伯遷撫安徽大府不果行而君以二年秋逝矣嗚呼惜哉余少與君受業孟考功之門及在京師與里閭顧不常聚然心折其賢蓋久聞其卒豈勝悲耶嗚呼師儒之官至今日而敝矣父師少師之教旣不行於左右塾而孤葉兔首饗食之禮又無以風示州邑儼然廟令長之末旅進退與丞掾佐史伍罷癯者供殿最而已強者或昧雉其弟子員或終其身不敢奉謁則悍然以違抗爲諸生罪噫是可傷已如君與謝教諭咸學校之干城儒林之圭臬其所爲皆他人所不能爲安得復起九原使斯道猶得以一髮而挽千鈞哉雖然君之言與行事彰彰在人耳目誦君之文論君之世者毋亦有激厲而奮興者乎余日望之矣君所著有宜居集愈瘠錄若干卷宜居者謂校官居卑居貧職易稱也愈瘠者謂時以言事自效冀求愈夫生而不瘠者之不幸淪於瘠也春秋六十有五配李孺人將以某年月日葬某地其孤白其邑來先期請銘銘曰

膠庠道敞津梁疇遵鼓篋何賴章縫曷親航航鄭君克盡厥職慈惠之師好是正直明扶紀綱幽釐禮式藥公社祀乃在儒林謂非遺愛悅澤青衿海水羣飛赤嵌徽外金湯一心扞城功最抱奇濟物俊才槃槃索

何高節卒辭長官

新詔徵賢網羅鷗鷺奈何厄命竟凋飛翰風花升沈豈君憂喜見蔑之心用道作砥君身雖歸君志不死吁嗟九泉誰為知己



碑傳集卷一百十二

貴筑黃彭年編訂

碑傳集卷一百十三目錄

佐貳雜職

贈文林郎翰林院編修故萊州府經歷顧先生昌祚墓誌銘 曹一士

永年典史張君芝玉墓表 劉青芝

賈經歷攀麟傳 潘挹奎

蕭山故淇縣典史汪君楷家傳 鄭虎文

又淇縣典史汪君家傳 羅有高

贈承德郎翰林院編修候選州同知蔣君堅墓誌銘 彭啟豐

石門縣主簿韓城王君廷詔墓誌銘 孫景烈

彭焯傳 彭啟豐

邳州州判葉君均墓誌銘 劉台拱

大城縣尉陶君兆磨墓表 李兆洛

鶴山藥運司巡檢寶公王璠德政記 吳應遠

碑傳一百十三目

歸山藥運司巡檢寶公王璠德政記

大城縣尉陶君兆磨墓表

邳州州判葉君均墓誌銘

彭焯傳

贈承德郎翰林院編修候選州同知蔣君堅墓誌銘

又淇縣典史汪君家傳

蕭山故淇縣典史汪君楷家傳

賈經歷攀麟傳

永年典史張君芝玉墓表

贈文林郎翰林院編修故萊州府經歷顧先生昌祚墓誌銘

佐貳雜職

碑傳集

卷一百十三目錄

佐貳雜職

贈文林郎翰林院編修故萊州府經歷顧先生昌祚墓誌銘曹一士
 仁皇帝臨御尊尚儒術凡經傳微言洛閩緒論極深研幾折衷於一其
 時宿儒大人接跡臺閣風聲漸被下至海隅僻壤好學力行阨窮之士
 莫不講明正學是訓是行郁郁乎盛矣哉所謂見而知之豈獨禹皋陶
 之徒若上海顧先生忍園亦其一也先生諱昌祚中康熙己酉順天鄉
 試第六初令江華有所建白忤上官意叱曰書黜盍歸鋤爾田對曰歸
 固某志官其土如不能惠其人何徐步而出調萊州經歷甲申四月卒
 於任年六十有四卽於是年冬十二月葬上海南匯城西郊三里一窳
 港北今屬南匯縣既葬三十有一年仲子成天謀下墓石奉所著衍範
 上下篇詣余乞銘其書推明儒者之道以為君師之總皇極之理盡在
 是不出乎天下萬世生民之心自二帝三王周孔以來莫之能外人才
 成敗由學術學術明闇由皇極君師之統分則道學之爭亟通上下合
 外內而一之惟皇極爾其辭貫穿反覆鉤深抉微不限訓詁然而平正

碑傳一百十三

切實經心聖域日月揭而江河行也嗚呼

仁皇帝集君師成澤被萬世於是書發其凡矣考諱其言崇禎庚辰進
 士仕至工科給事中有文行世祖諱國憲贈文林郎妣封孺人李氏祖
 妣贈太孺人方氏配贈孺人張氏歲貢生鐔女合葬公兆子三長用烈
 廣膳生季用芳國學生早卒仲成天丁酉舉人以茶輓

仁皇帝詩上徹聖聽命侍皇子讀書庚戌
 欽賜進士官翰林院編修能守其家學孫男五人曾孫男六人先生居
 父喪服闋且半載始與宴會赴鄉舉師之急於京師歷久不舍人皆義
 之幼通敏於經無所不習獨邃於易讀之積萬遍不輟在萊日與諸生
 講貫往復成衍象五十四卷一夕燼於火惟衍範存居平善人倫鑒嘗
 從書肆見其所刊己卯闈牘選序驚曰是不能自容兵在頸矣何以能
 卒越十五年果驗銘曰

義圖箕書經緯明皇哉萬古開羣蒙握要執樞道以彰降而文勝扈辭
 與棄木逐末逆聖經矯之已甚失則狂六經註我善惡亡以儒詬儒紛
 異同浸淫失守亡其羊先生憂患峻厥防作圖陳義剖毫芒帝有彛訓
 儒者當遵皇之極遊康莊繁星繫天川朝宗用雖未施道已光歿而言

立此其藏

永年典史張君芝玉墓表

劉青芝

同里張漢德焯兄弟書其父永年典史諱芝玉字蘭生之行治世次因周生淵踵門載幣涕泣再拜而請曰先人葬有日矣願先生錫之言以表於墓則先人死且不朽按狀張君任典史在康熙癸未歲歷七年致政歸先是庚午由給事縣庭為武清楊村驛驛丞凡十五年乃改今官古者館不名驛而名傳賓至里人授館膳夫致餐廩人獻餼司馬陳芻工人屨車皆丞所司也典史元制在漢為尉主盜賊凡有賊發主名不立則推索行尋案察姦宄以起端緒今之人能舉其職亦足多矣而張君之在武清也值山東大饑流者相望境上奉憲檄監賑躬親臨視計口授糧俾均霑上德又自市棺百餘口給死者無使露骸骨不足復施席箔永年蝗為災縣令俞已請賑矣君曰賑令下饑者久填溝壑請其制已俸施粥以待其厚於仁以濟物斯固職外事也可不謂難乎致政歸後兩地父老朝武當者道由襄多致方物云弟芝明芝秀自少異炊而食各為置田百畝且授之券焉性節約裳衣疏麤易質之夕願諸子曰願子孫師吾儉又曰吾自揣生平無大過後世或有昌者爾輩其勉

碑傳一百十三

二

於學以實吾言尋卒幼善星家言嘗曰吾年六十四其不免矣六十二致仕越二年卒如其言云君之先山西弘農人祖有成遷襄因家焉父文斗夫人劉氏繼室劉氏五男子溥治中薦博富川典史夫人出漢太學生德煇拔貢生繼室出孫六永安承甯承泰承康承祚承慶曾孫三景晟哭以康熙五十七年五月十九日卒乾隆六年二月十九日葬於先塋之次嗚呼今之葬其親者競為非禮之易紛華道路而已而漢兄弟獨乞不腆之詞以圖不朽其先人於百世斯意不可孤也遂次序其生平俾揭於其墓之原

賈經歷攀鱗傳

潘光奎

經歷姓賈氏名攀鱗字昇霄武威人為縣掾史援例考授府經歷康熙乙未謁選除山西平陽府經歷莅任之始歲值荐饑餓孳載道民多逃亡經歷捐俸賑貸至再且勸富民各出賞為拯救計或難之經歷為陳說男婦流散之狀瑣細詳書至揮涕淫其袂富民哀動不吝所私全活無算已而上官聞其賢能檄監放他郡縣賑銀米經歷籌畫精當期於實惠及人以故經歷所至民稱再造或有立生祠以尸祝者又平陽地震豪梟乘閒剽掠時知府為奉天主輔偕經歷日夜巡行城郭禽其魁

置重典民始獲安凡經歷在官九年平陽迭遭重災而丁戶不耗經歷
佐理之力實多然憂勞所積病遂不瘳以雍正甲辰卒於官貧無以斂
百姓贖錢送其喪歸武威哭之如失怙時焉先是有何斯美者吾鄉鎮
番舉人順治間宰平陽屬之翼城姜瓖作亂翼城被兵尤數斯美與弟
斯盛督鄉勇禦之賊猝至圍城歷九晝夜斯美力拒戰翼城卒完
潘挹奎曰官無崇卑凡以爲民設也無裨於民而反以毒民可云官乎
何邗縣衛民於戈鋌矢石之間賈經歷舖賑民於流離瑣尾之際捍患
禦災雖未僚也而其功德可百世祀夫江河淮濟萬派奔騰然艱于灌
溉溝洫若無足奇者民以收耕穫之利於此見士苟受朝廷一命已可
澤及於人垂令聞于不朽尙其毋以所居之下自畫哉

蕭山故淇縣典史汪楷家傳

鄭虎文

故河南淇縣典史蕭山汪君卒後三十有六年其孤輝祖成進士始以
狀來涕泣再拜乞傳於余曰某幸當代大君子哀其孤而錫之銘誅矣
某辱先生門下願獨不得先生文垂不朽必某不肖棄某及親某且無
以視息於世惟先生閔恤之余感其誠諾之病未有以應也復固以請
乃力疾而爲之傳曰

碑傳一百十三

三

君名楷字皆木又字南有系出唐越國公華居婺源凡一再遷而至浙
之蕭山遂世爲蕭山太義村人考之翰生二子長卽君也少師蔣太史
棡之通經義以貧不能養棄去法刑名學成念非仁術復棄而服賈久
之致田可百畝乃入貴爲淇縣典史君曰是亦學者求仁之地也且向
以不忍廢所學今可以不忍行所學矣於是愛囚如慈母之孔子謹伺
其飲食疾病寒暑便旋燥溼日入獄視必辯不以閒以故獄卒侵剋榜
掠非法刑繫不得施用當君時囚無瘐死者遇獄有冤若豪猾之爲民
病者隱若在己必達其志乃已有薄某者鄰人私其乳媪匿媪而使
夫誣薄掠死媪薄愿不能自明願以不得尸未決君察其冤白令復廉
知鄰匿媪室中乃名其人窩他縣盜賊直入其舍取媪出而脫薄於
獄又有陳生某以財雄豪橫無狀怨家莫敢訟訟亦不直一日使酒撲
平人受撲者恃君廉疆乃起愬君立捕繫之陳以白金啖君君怒摩之
盡發其稔惡狀上之令論如法君之在事都類此然未嘗爲家人道說
故不祥後子輝祖得諸洪人之口傳以熟者僅此一二事云淇之人又
曰故事尉歲必祝生尉之父母若妻皆祝歲可得錢百千其他富室之
死喪昏嫁則有慶弔縣符下若鞠訊勘丈搜捕鉤稽一切事則有高下

出入是皆名錢而歲入無有常數者吾公惟兩親生辰受士民燭然於庭以錢壽者則曰是污吾親還之餘皆禁斷壘釐無所染每飯佐止瓜菜闕扉東隙地課種自給賓至房左右民輒知之以非是未嘗市酒肉也去之日吾公乘蹇騾一老僕從夫人公子乘獨輪席帷車蕭然就道送者擁路未嘗不歎息泣下也君又嘗自言曰吾在官不輕杖入不得已而用之爲不憚終日人孰無廉恥或受杖而愧悔以死其可贖乎蓋君雖卑官一於廉仁倘所謂古之遺愛歟在洪八年念親老家有產足供菽水遂引疾歸歸則田盡逋積旋遭父喪益困無以養其母遊廣州無所遇竟卒春秋四十有六元配方孺人繼配王孺人後君三十六年卒副室徐孺人後君二十三年卒乾隆二十三年有司以雙節聞於朝詔旌其門子輝祖乾隆乙未進士孫四繼坊繼埔繼埭繼培

又淇縣典史汪君家傳羅有高

碑傳一百十三

四

君諱楷字皆木又字南有其族別自徽州婺源先世凡再遷而著籍紹興之蕭山君始慕儒術學于翰林蔣斌之家貧齋于養因而治刑名釐穀辨贖上下比服輕重條理委揣綜會熟貫矣念折獄之難惡疏粗錯繆虧仁韜不肯以試更廢居而事賈已而爲典史衛輝淇縣視獄囚喟曰是亦學者求仁之地也舉吾職而已既居其位復傲然存不屑之心標置高雅頽放以立異與詭隨闖茸等耳君子素位之道果若是乎哉于是覈囚米嚴禁獄卒私掠囚械器刑具不載于令者斷棄之病囚醫藥必選擇按驗乃進用拊循閱覺若母若師日有常不以蔑吝欺怠視囚外手書咛哦泊如也不妄受辭無襍謁縣符下有所鞫訊從容究擊未嘗輕杖人嘗曰倘受杖者緣此愧恨戕其生吾能不疚于志乎在淇凡八年以親老引疾歸未幾客廣州卒于廣州

率常德厲官箴宜其能感人至是然而如是焉止矣惜哉

贈承德郎翰林院編修侯選州同知蔣君堅墓志銘 彭啟豐

鉛山蔣翰林士銓自京師乞假歸教授江湖間所至必御母以行乾隆四十年春母鍾太安人卒于揚州安定書院子寓書往唁之已而士銓使者來陳幣及報書云將以太安人喪歸鉛山與承德君合窆于某所而乞子為之志子讀士銓所為承德君狀類古之豪俠好義者而豈弟積中隨感輒應殆又所養致然惜乎不大其施其所效者于是焉止矣君諱堅字非磷先世隸浙江之長興父諱承榮字靜之遺明之亂避居江西之鉛山為鉛山人三子君其季也七歲出為叔父後年十三靜之君與二子皆遠遊家甚貧君念母祝孺人榮然無所賴會其叔父已有子乃泣涕請歸養許之遂質衣冠得錢八百販米于市以其贏具甘旨祝孺人安之稍長益怙慨樂赴人之急嘗出為叔父收責得金一鎰歸過其友黃黃方負人金索者至出惡語君為解之索者忿曰我索金于黃何豫汝汝誠庇黃何不以金與我君笑曰若以吾吝此金邪即盡出金子之索者慚謝去君向所主朱君者將謁吏部選欲邀君與俱未發聞以金子黃而未有以償也乃曰黃吾友也君誠與我偕吾當任其金君既失金慮無以報叔父乃許諾從朱君行舟出大江朱君倉猝墮

碑傳一百十三

五

水君故善泅社祿躍入洪濤中浮里許握朱君髮提其首出江面翼而行遇浮槎馮焉遂得脫居京師頃之有故人王君出為定襄令要之至官司會計出入必嚴有吏袖金私之叱使去吏皆受約束期年又去之肯嵐守備張君所出郭日民間多執壺酒饒于道君為感飲醉而去既至肯嵐前令嚴君習法家言見君為攝令判獄語奇君才招往盡以其學授之由是君所至決斷如流發姦擿伏眾以為神康熙五十二年主于澤州守佟君國瓏時臨汾令暴而貪民不堪羣聚大噪執毆之城民洵洵各徙于郊以觀變巡撫檄佟君往令以兵從君曰若然是速之變也乃與佟君疾馳以七人從自日中至晡行二百里及郊見四山人皆蟻聚揭竿樹鉏且作亂君自佟君取巡撫令箭先往視之而號于眾曰巡撫憐汝民為吏所苦令太守來治之鼻不在民汝勿恐乃還屬佟君入縣治坐聽事呼令出其胥五人并縛之鞭胥流血觀者如堵佟君謂之曰爾等不顧父母妻子邪何不復爾居眾唯唯皆散去明日挾諸囚復命巡撫臨汾遂甯佟君尋乞休君始歸里遭母喪服闋娶鍾太安人時君年四十六矣居家篤于兄弟在外時間將析產乃讓田于弟常累千金施貧者輒盡出遊見貧婦十餘人率幼稚繞岸泣衣不蔽身

問之曰適遭焚漂故致此君出笥中布二十四皆散之已而聞佟君以屬官虧帑被逮責償數千金獄急遂走天津省其家至樂城爲佟君索遺千金復至澤州澤州人故德佟君願代之輸州守弗聽及君至守有疑獄欲委君決之君因責以必脫佟君守遂下令有願代佟君輸者聽三日得五千金佟君遂出獄復賈其衣裘贖之歸客太原三年已復往來南北乾隆十三年卒于家年七十一君治法家言二十年間語其子曰刑法所以救世也能念念求人之生斯善用刑法矣著求生錄四卷律斷二卷配鍾太安人諱令嘉字守箴年十九歸于君逾年生子士銓君既起佟君之難寄孥外舅家太安人口授兒四子書及唐人詩及士銓年十五受九經畢始就外傳焉平生安儉泊亦好施子年四十餘夢北斗神官授以梵經一冊既覺以道家言持斗齋每中夜禮誦爲人祈禱多奇驗先歿前十餘日夢至一徭見廳側諸吏據案對簿持算子會計見太安人曰來視此簿爾所誦斗經已六百六十四藏矣越數日無疾而卒年七十君以太學生需次州同知尋以士銓官贈承德郎翰林院編修加二級妻封太安人孫四人知廉知節皆諸生知讓知白曾孫立中立方銘曰

碑傳一百十三

六

秦燔六籍法律尊商韓錮毒流千春春風扇處寒谷温拈來藁草能生入生人無數人不聞天公眷爾光後昆左桃古義日月新有妻翼子陶孟鄰閭房靜好詩書敦入夷出險了不分咸有一德石與鈞堂防孔固鑄斯文子孫世世宜書紳

石門縣主簿韓城王君廷詔墓誌銘

孫景烈

余再掌關中書院時同郡之來學者不乏才而其文俊逸不羣爲諸生所交推者韓城王杰也余因其有進取之志導以正學杰卽信而從之曰杰父教杰兄弟親師取友者意實在此時杰父據濱君方爲浙江石門縣主簿而杰與從兄煩胞兄澈自浙歸同學於關中余遂得悉君之所以教家與所以勤于官者越數年君罷職又數年杰以選貢授藍田教諭余方謂君志未竟者樂觀其子之克繼也未幾杰匍匐來武功以君卒於乾隆十九年四月廿六日是年十二月十六日安葬先塋之次而乞余銘君之墓矣嗚呼惜哉君諱廷詔字鳳銜濠濱其號也先世自晉洪洞遷韓爲農家父象峯公居鄉有盛德生三子君其季也君少就外傳貧不能卒業而所誦四子書終身實得力焉嘗釋耒而歎曰吾不能以文學起家奈何令子姪仍爲農夫乎遂由營田例得任浙之杭

州府中務稅課司大使盡子姪八人以行至卽延師教授而君於公務之餘亦理及舊業與其師相質辨迄今子姪八人皆彬彬然功名方盛不可量君之敎家已有成效矣其爲大使也每夜分巡城中同官詭與上司遇君獨否上司皆廉知其誠器重之委署無虛日制府坦齋程公方伯榜阿張公尤倚任焉而其勞績卓卓可紀者督運黔餉招撫平陽災黎二事爲最方黔之苗民騷動王師芻粟不繼

上命浙省運餉二十萬程途修阻督者難其人有言於制府藉相國者曰非王大使不可制府遂遣之同行者墮淚別家人君毅然前往無懼色且曰蠢茲不恭弄兵潢池中聞軍餉至當鼠竄耳爰飭護兵如期至

歷十月乃歸制府薦於朝引見准回原任候陞君之未回任也温郡大饑平陽民尤多散者制府曰此又非王大使莫濟君歸杭行李未至署卽受檄兼程赴平陽擇縣事宣布

皇恩分廠施粥招逃亡撫之平爭訟祈甘霖禁鬻男女皆肫肫懇懇如古循吏之用心故平陽人有十政歌君返而平陽人不遠千餘里爭載斗持旂以送平陽之俗官有德于民者民爲斗尋推陞石門縣主簿主

簿九年去之日民釀錢以餽君弗受曰吾居官已不受而賄矣民乃以錢置酒日享君于途錢盡羣泣而別明道先生曰一命之士存心愛物

于人必有所濟其君之謂乎君生康熙三十五年八月廿七日享年五十有九娶吳氏例封孺人生子三長濬癸酉武舉娶郭氏次澈縣學生

娶文氏次杰娶程氏孫男三遇時業儒娶梁氏濬出乘時聘解氏得時幼俱杰出孫女二長濬出次澈出其後蕃衍矣銘曰君弗違于學也而家學之源匪君其誰開君弗顯于仕也而仕獨殫厥

才存順也沒寧也永棲幽宅任古往而今來

彭焯傳 彭啟豐

族弟庭輝名焯世爲長洲人祖諱宗求精醫理父諱應乾爲人修謹自愛庭輝生五歲而孤母陸孺人勤苦治生延師教子讀書庭輝年十六

以商籍補仁和諸生乾隆九年納賞謁吏部選得西安府渭南丞居官廉而有幹渭南屯民張緒勳等逋縣官賦捕急而譁糾眾至縣門門閭爭投瓦石頃刻滿縣庭令窘莫知所爲庭輝徐出諭散之而密籍其巢

三四人以待翼日縣令白上官請發兵往勦庭輝謁巡撫陳文恭公言爲變者不過三四人得一吏治之足矣其餘率烏合急之恐生亂陳公

然之卽令庭輝輕騎往屯所召其老人前語之曰汝等皆良民皆有妻
子兄弟奈何以緒勳等故甘受滅門之禍亟出緒勳等餘一切不問不
然爾台屯無噍類矣老人哭曰邪活我遂出緒勳等四人具狀上巡撫
寅諸法先後擢永壽商南鎮安渭南諸縣事並有聲績乾隆十六年陳
公以卓異薦引見

賜蟒一襲回任尋以母疾乞歸在官十年省冤獄賑貧民甚德之去
之日民間遮道焚香獻衣脫靴送者以萬數既歸家杜門守約出必徒
步事母孝謹晨夕未嘗離母年九十卒庭輝年亦七十矣孺子泣過時
而哀族人謀置潤族田庭輝首捐金以倡以其息贍諸孤裔族人賴之
卒年七十有二嗣子一材一培

鄧州判葉君均墓誌銘

劉台撰

君諱均字階平姓葉氏故宋觀文殿學士夢得之後世居吳縣洞庭東
山高祖士美始占籍上元曾祖文元祖永菁皆不仕父向皋候選州吏
目贈奉政大夫嘉興府同知母沈氏贈宜人君少爲工部掾考滿議敘
以從九品簡發江南河工試用補實應縣主簿實應瀕運河沿隄八十
里置閘與涵洞二十餘所丞主簿實分領之閘洞之水下注溝渠分漑

碑傳一百十三

八

田畝四五月之閒尤食其利而是時漕引方急吏務蓄水以濟運民常
苦旱至於淫雨爲災溝渠滿衍田中之水壅遏不得宣洩勢非急閉閘
洞不能救而吏以水盛宜固隄防灑水四注民田爲壑惟君相時緩急
調濟有方公私交利民咸便之乾隆三十一年夏大水君以閉閘爲通
判所劾河督急召君問狀君曰

皇上軫念民依於高郵三壩立椿以志

諭曰水不至椿三尺勿開壩蓋言大漲則放水以固隄小漲則遏水以

顧田廬今水至椿尙不及三尺隄雖險人力可護奈何不顧百姓河督

雅重君又嘉其言直置不問以親老乞終養尋丁外艱服闋補原官四

十七年大旱又以啟閉爲監司所劾亦賴河督知君卒無事調桃源縣

主簿遷清河縣丞又遷邳州州判致仕以子世倬官誥封奉政大夫嘉

興府海防同知乾隆六十年七月二十三日卒於清江浦享年七十有

六娶范氏贈中憲大夫刑部陝西司郎中諱文聯女有閭德誥封宜人

先君四年卒享年六十有八子男五世經丁酉科舉人綏甯縣知縣世

倬甲午科舉人德安府清軍同知世綸世俊世佐皆國子監生世佐先

卒女一適戊申

恩科舉人宮秉鑑孫男十德晉德升德泰德恆德謙德萃德豐德異德履德鼎孫女五曾孫男一清甯嘉慶二年二月二十八日世經等葬君舍山縣洽南六十里羊山之麓以宜人祔君善與人交急人患難一言一命之土存心愛物道則既伸身亦不訕積善有報在其子孫我民之

恩志於墓門

大城縣尉陶君兆磨墓表

李兆浴

中書陶君際堯奉其先贈君春溪公之狀謁予而言曰先府君三十而從宦六十而歸休際堯之生也府君年六十有四府君之棄諸孤也際堯年二十有一於府君從宦事蹟不能詳所覩記者居里黨宗族聞事而又不能窺見旨意規模精神徒以籍籍人口者綴其大凡耳今距府君棄養之日已二十年際堯僥倖舉京兆捷南宮入中書府君不及見也遭逢

紀 皇上登極覃恩制誥追贈思古人捧檄之喜彌增摧裂將礪石墓道以

恩遇且志其無窮之悲願吾子之有以表吾先人也余既受狀而讀之

碑傳一百一十二

九

而復於陶君曰歸熙甫為贈檢討許君墓表愴愴于天厚有德將興其家不當其身而特鍾於其子許君者文穆公國之考也文穆始入翰苑而屬熙甫為墓表之文厥後文穆躋台輔為名臣皆如其言許君布衣特以行誼著稱非如尊贈君所至有宦蹟利澤及於人也君將恢令緒光大餘慶其不為文穆乎哉按狀贈君諱兆磨字拱之春溪其自號也世為會稽人著清望贈君至性純篤父華峯公病嚙指血書疏以禮封肱肉和藥進之病以霍然尚氣節重然諾讀書不事章句而制舉業下筆輒屈其儕偶游句山太僕之門稱高足弟子既屢困場屋謀祿養援例得直隸深澤縣尉繼以改近安徽宣城歷尉歛財貽丁內艱起復補直隸大城尉所至有聲績其在深澤也澆水溢壞民田廬為疏其壅洩其漲築堤捍之日捐捐泥淖中不恤也其在歛也邑有名宦號半升太守乃贈君六世從祖比贈君莅邑亦以清惠著民因並頌之在大城尤一意釐剔奸宄邑無賴子相聚博戲監生王倬為之囊橐悉捕治坐襦革者十餘人生員李某與太監劉某有連倚勢暴鄉里發其奸杖而徒之以此不中上司意遂棄官歸其強直剛毅如此家居二十餘年誘掖後進如恐不及家無中人產而喜賑恤乏困里有忿爭輒就取正得

片言無不立解者伯兄早卒嚴事孀嫂撫其子女迄成立弟某尉良鄉
既罷官迎之同居晨夕怡怡有兒無常父衣無常主之風配袁孺人繼
配俞孺人贈君以嘉慶二年丁巳卒年八十五俞孺人道光甲申卒年
七十八以道光某年月日合葬于會稽小路山左過龍山之原子四人
際華桐城縣尉際唐鴻臚寺序班際堯其季也嘉慶丁丑進士內閣中
書孫一人曾孫三人贈君之所措施未盡其用即所著見一二固亦無
媿于古人矣則天之所以使其保世滋大也豈偶然哉謹詳列之俾揭
諸墓道云

鶴山藥逕司巡檢寶公玉璠德政記

吳惠達

將荆江山山滇阿迷羅雄逕廣南泗城田州盡挾滇黔交桂諸水東走萬
餘里至端州爲羚羊峽所束出則建瓴而下至思賢濬分爲二一由三
水西南逕佛山以趨珠江一由石門過金山以抱會城其不入思賢濬
者則由馬口三洲直下達崖門以入海今佛山沙口水漸涸金山尤甚
全勢直注三洲四五月中大雨暴漲如奔萬馬而古勞一圍正當其衝
嘉慶某年某月寶公來署藥逕司巡檢輒進諸父老問所疾苦父老曰
吾等瀕江而居恃基圍以自固圍潰則民不聊生盜賊蠡起今則歲有

碑傳一百十三

十

水患矣公曰豈無所以弭患者乎父老曰古勞大圍緣互數百里凡二
十四堡田二百餘頃民之衣食資于田田之利資于圍圍之固資于石
圍不固則有田如無田也圍外舊有魚苗之利歲召佃取租以爲歲修
之費乾隆初土豪構訟盡歸之官水潦突至請領不時或准給而實不
給于是圍之害不可言而人民之害更不可言矣言已則皆歎息公曰
歸之官者獨不能復歸之民乎父老曰難言也吏胥盤踞方因之以爲
利其能取諸懷而棄之乎公奮然曰吾當以去就爭之矣于是條陳利
弊上於督撫郡縣皆得請擇紳士賢者司其事官於水涸之時逐堤查
勘隨時修築冊報如例庶幾可以行久而長享其利矣達竊謂國家巡
司之設所以詰奸懲除盜賊暇則以時課農桑博奕耳事權不屬卽
欲修廢舉墜而左右掣肘恆不能得所欲爲公則毅然以革弊安民爲
己任事必濟而後已自今以往古勞之民起溝壑而登諸衽席者皆公
賜也且當徵西湖白堤蘇堤之例名曰寶公圍以誌公德矣未幾公得
代去父老送者塞於途乃勒石紀事以告來者公名玉璠河南柘城人

